

Inatsisissatut siunnersuummut oqaaseqaatit

## **Nalinginnaasumik oqaaseqaatit**

### **1 Aallaqqaasiut**

#### 1.1 Siunnersuummut pingaarnertut tunuliaqutaasut

Kulturikkut sunngiffimmilu ingerlataqarneq pillugu nukittorsaanissaq Naalakkersuisunit anguniarneqarpoq. Naalakkersuisut isumaqarput timersorneq timigissarnerlu pillugit immikkut inatsisiliornissaq tapersersorniarlugu tunngaviussasoq pingaaruteqartoq.

Kulturikkut sunngiffimmilu ingerlataqarneq pisortat akisussaaffigilissagaat inatsisissatut siunnersuutikkut anguniarneqarpoq, matumani pisortat oqartussaasut suliaasaqarfimmi akisussaaffiisa ersarissarnissaat.

Naalakkersuisut isumaqarput kulturikkut sunngiffimmilu suliaqarneq innuttaasunut inuiaqatigiillu ineriartornerannut pingaaruteqartorujussuusoq.

#### 1.2. Inatsisissamik piareersaarnermi pingaartitat

Kulturikkut sunngiffimmilu ingerlataqarneq pillugu inatsisartut peqqussutaannik nutarterisoqarnissaa Naalakkersuisunit pisariaqartinneqarsimavoq. Tassunga atatillugu naleqquttutut isigineqarsimavoq tunngaviusumik inatsisilik pingasunik piareersaanissaq. Eqqumiitsuliornermut tunngasunut tunngaviusumik inatsit, immikkut kulturi pillugu inatsit, tassani ilaatinneqarlutik kultureqarnermut tunngasut iluanni sunngiffimmi ingerlataqarnerit kiisalu immikkut timersorneq pillugu inatsit, tassani ilaatinneqarlutik timersornermut tunngasut iluanni sunngiffimmi ingerlataqarnerit. Tassani siunertarineqarpoq eqqumiitsuliornermut kultureqarnermullu ingerlataqarfiit tamarmik pisortat akisussaaffigisaattut pitsaanerumik erseqqinnerusumillu inissinneqarnissaat.

Tunngaviusumik inatsisit nutaat eqqumiitsuliornermut aamma kulturikkut ingerlataqartut, kommunit kiisalu Naalakkersuisut akornanni akisussaaffiit agguarneqarneri erseqqissarlugillu paasiuminarnerulersissavaat. Inatsiseqartitsinikkut nutaakkut innuttaasut kulturikkut suliaqarnermi peqataanerulernissaat siuarsarniarlugu kulturikkut sunngiffimmilu sammisassat arlallit periarfissaanissaat qulakkeerniarneqarpoq.

Missingersuutit qaffasinnissaat aqqissugaanikkullu aqqiinerit tamatigut politikikkut nalilersuiffigineqarlutillu pingaarnersiorneqartassapput. Taamaattumik pisortat akisussaanerannut naleqqiullugu pingaarnertigut tunngaviusumik inatsisit nalunaarutinit, politikikkut nalilersuinerit pingaarnersuinerinullu ingerlaavartumik naleqqussarneqartunut naleqqiullugit immikkoortuni kinguneqarluartumik eqaatsimillu malittarisassaliornerussaaq.

Siunnersuut aamma Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap UPA 2015/32-mut allannguutissatut siunnersuutit saqqummiusnaanut Inatsisartut akuersinerannik Naalakkersuisut naammassinninnerattut isigineqassaaq:

”Kulturikkut ingerlatsineq sunngiffimmilu sammisassaqtitsineq pillugit Inatsisartut peqqussutaata nr. 10-p, 21. maj 2002-meersup allannguutissaatut siunnersuummik kingusinnerpaamik UPA 2016-imi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut kulturimut immikkut inatsimmik aammalu timersornermut immikkut inatsimmik suliaqartoqarsinnaaqullugu.”

Inatsisissamik piareersaanermi kommunit arlalitsigut peqataatinneqartarsimapput. Kommunit taamaalillutik aqutsinerat Kulturikkut ingerlatsineq sunngiffimmilu sammisassaqtitsineq pillugit peqqussummut atuuttumut tunngasunik apeqqutinut tunngasunik akissuteqaqquneqarsimapput peqqussummullu nutarterinissamut kissaataat pisariaqartitaallu pillugit nassiusseqquneqarlutik. Taakku saniatigut kommuninit inatsisilerivimmillu aallartitat ataatiittarsimapput.

Inatsimmut piareersaalluni sulinermi KANUKOKA isumaqatigiissutigineqarpoq paaqqinnineq aamma atualernissamut piareersarfik meeqqallu atuarfiannut tunngasut pillugit pisariaqartitanik misissueqqissaartoqarnissaanik. Taamaammat naatsorsuutigineqarpoq inatsimmik piareersaasussanik suleqatigiissitaliortoqarnissaa, suleqatigiissitallu suliaassarfik misissuiffigilluassavaa suliaassarfimmilu siunissami aaqqiissutissanik inassuteqaasiussalluni. Tamanna ilaatigut aallaavigalugu immikkut malittarisassiuunneqarnissaanik kinguneqarsinnaavoq, imaluunniit suliaassarfimmi tassani malittarisassanik atuuttunik allannguineramik kinguneqarsinnaalluni.

### 1.3 Siunnersuutip imaata nalinginnaasutigut ilisarnaataa

Inatsisissatut siunnersuutip siullertut siunertaraa pisortat oqartussat akisussaaffiisa pisinnaatitaaffiisalu ersarissarnissaat kiisalu suliaassarfimmi tamatumani tapiisinaanerat ilanngullugu eqqarsaatigalugu. Taakku saniatigut sunngiffimmi ilinniartitsineq sunngiffimmilu ornittakkat pillugit malittarisassat nutarterneqarsimapput ersarissarneqarlutillu. Aamma sunngiffimmi ornittakkat pillugit malittarisassanik ilanngussisoqarpoq.

Kulturikkut ingerlatsineq sunngiffimmilu sammisassaqtitsineq pillugu Inatsisartut peqqussutaannut tunngatillugu siunnersuut taamaallaat kulturikkut ingerlatsinermit sunngiffimmilu sammisassaqtitsinermit malittarisassiuunneqassapput, tassa eqqumiitsuliornermut timersornermullu aamma timigissarnermut tunngasut immikkut taakkununga inatsisiliuullugit malittarisassiuunneqassapput.

## **2 Inatsisissatut siunnersuummi immikkoortut pingaarnerit marluk**

a) Inatsisitigut aalajangersakkat atuuttut

Kulturikkut ingerlatsineq sunngiffimmilu sammisassaqaqtitsineq Kulturikkut ingerlatsineq sunngiffimmilu sammisassaqaqtitsineq pillugit Inatsisartut peqqussutaat nr. 10, 21. maj 2002-meersukkut (kulturimut sunngiffimmullu peqqussut) malittarisassaqaqtinneqarpoq.

Peqqussummi §§ 2 aamma 3-mi aqutsineq pillugu maleruagassanik aalajangersaasoqarsimavoq, tassunga ilanngullugu akisussaaffiit agguarneqarneri. Taamaalilluni § 2, imm. 1-mi aalajangersarneqarpoq kommunalbestyrelse kommunimi kulturikkut ingerlatsinermut sunngiffimmilu sammisassaqaqtitsinermut qullersaalluni akisussaavoq innuttaasullu innuttaaqatigiikkuutaalluunniit kulturikkut sunngiffimmilu sammisassatigut tamakkiisumik neqeroorfiginissaat anguniarlugu anguniagassat tunngavissallu aalajangersassallugit. Imm. 2-mi aalajangersarneqarpoq ukiut tamaasa illoqarfimmi nunaqarfimmiluunniit kulturikkut ingerlatsinissamut sunngiffimmilu sammisassaqaqtitsinissamut kommunalbestyrelsi pilersaarusiortassaaq. Imm. 3-mi aalajangersarneqarpoq kommunalbestyrelsip atorfinitsissavai sulisussat kommunimi kulturikkut sunngiffimmilu sammisassaqaqtitsinikkut sulinermi ulluinnarni ingerlatsisussat pisariaqartut.

§ 3, imm. 1-mi aalajangersarneqarpoq sumiiffinni kommunit aggornerisa avataanniittuni peqqussut manna malillugu kommunalbestyrelsimut ulluinnarni suliassarititaasut Naalakkersuisunit isumagineqassapput. Imm. 2-mi aalajangersarneqarpoq imm. 1 malillugu Naalakkersuisunit isumagisassanngortitaasut kommunimut ataatsimut arlalinnuunniit kommunalbestyrelsi isumaqatigalugu Naalakkersuisut sularisassanngortissinnaavaat.

Aqutsinermut maleruagassat nakkutilliineq aamma aningaasalersuineq pillugu aalajangersakkanik ilassuteqarput. Taamaalilluni § 37-mi aalajangersarneqarpoq aningaasartuutit kulturikkut ingerlatsinermut inunnillu qaammarsaanermut atorneqartut kommunit tamakkerlugit akiligassaraat, aningaasartuutit tamakkerlugit ilaannaaluunniit Namminersornerullutik Oqartussanit (maannakkut Namminersorlutik Oqartussat, aqq.) allanilluunniit akilerneqassasut inatsisitigut erseqqissumik tunngavissiisoqarsimanngippat. Namminersornerullutik Oqartussat kommunillu suliassat peqqussummi suliassiissutaasut sularinissaannut akiliuteqarlutik isumaqatigiissuteqarsinnaapput. Imm. 2-mi aalajangersarneqarpoq sumiiffinni kommunit aggornerisa avataanniittuni aningaasartuutit Naalakkersuisunit akilerneqassapput.

§ 40-mi aalajangersarneqarpoq peqqussut manna naapertorlugu kommunalbestyrelsit aalajangigaat pisortanut oqartussaasunut allanut suliassanngortinneqarsinnaanngillat. Sulianut Naalakkersuisut isumaqatigineratigut kommunalbestyrelsimut tunniunneqartunut tunngatillugu kommunalbestyrelsip aalajangigai aalajangiinermiit sapaatit akunneri sisamat qaangiutsinnagit Naalakkersuisunit suliassiissutigineqarsinnaapput.

§ 36-mi aalajangersarneqarpoq Naalakkersuisut peqqussut malillugu isumagisassaminnut paasissutissat pisariaqarsorisatik kommunalbestyrelsimit piumasinnaavaat.

§ 39-mi aalajangersarneqarpoq Naalakkersuisut pissutsini immikkut ittuni aaqqissuussigallarnertut peqqussummi aalajangersakkat saneqqussinnaavaat peqqussutip iluani misileraaneq siuarsarumallugu tamanna pisariaqartutut isigineqarpat, aamma imm. 2 naapertorlugu naalakkersuisut misileraanernut tapiissuteqarsinnaapput.

§ 27-mi aalajangersarneqarpoq meeqqat inuusuttullu suliniaqatigiiffiitut sanilliullugu killiliinissaq pillugu Naalakkersuisut malittarisassiussasut.

Peqqussummi kapitali 3-mi pineqarput sunngiffimmi atuartitsinermi malittarisassat aalajangersarneqarnerat, matumani ilaallutik sunngiffimmi atuartitsineq qanoq paasineqassanersoq, sunngiffimmi atuartitsinerup aaqqissuunna, sunngiffimmi atuartitsineq kommunalbestyrelsimit akuerineqartarnissaa, sunngiffimmi atuartitsinermi eqimattanik pilersitsineq atorunnaarsitsinerlu kiisalu sunngiffimmi atuartitsissutit ataasiakkaat.

Peqqussummi kapitali 4-mi aalajangersarneqarput sunngiffimmi sukisaarsaartarfiit klubbit pillugit malittarisassat, matumani ilaallutik sunngiffimmi sukisaarsaartarfik klubbi sunaanersoq nassuiarneqarluni, pilersinneqarnissaanut piumasaaqatit, sumut atornissaat kiisalu kommunalbestyrelsip sunngiffimmi sukisaarsaartarfinnut klubbinut kommunip ingerlatarinngisaannut tapiissuteqarsinnaanera.

Peqqussummi kapitali 5-imi pineqarput Meeqqat inuusuttullu suliniaqatigiiffii, matumani ilaallutik suliniaqatigiiffiit nassuiarneqarneri aamma suliniaqatigiiffiitut taakkununnga tapiissuteqarsinnaaneq.

Peqqussummi kapitali 7-imi højskolit pillugit malittarisassanik aalajangersaasoqarpoq, matumanilu Kalaallit Nunaata avataani højskolimiinnernut tapiissuteqarsinnaaneq.

Peqqussummi kapitali 8-mi Kulturikkut ingerlatsineq inunnillu qaammarsaaneq pillugit malittarisassanik aalajangersagaqarpoq, matumani tamanna qanoq paasineqassanersoq, kiisalu tapiissuteqarfigineqarnissamut piumasaaqatit pillugit malittarisassat.

Kiisalu peqqussummi kapitali 9-mi init silamilu ingerlatsiviit pillugit malittarisassanik aalajangersagaqarluni.

§ 32, imm. 1-imi aalajangersarneqarpoq Kommunalbestyrelsip sunngiffimmi atuartitsinermut aamma sunngiffimmi sukisaarsaartarfinnut klubbinut akuerisaasunut akeqanngitsumik atugassanngortissavai init atortorissaarutillu allat pisariaqartitat, tamatumani ilanngullugit init atuarfiit, silami ingerlatsiviit inissallu tamanut ammasut allat.

§ 32, imm. 2-mi aalajangersarneqarput Kommunalbestyrelsip meeqqat inuusuttullu suliniaqatigiiffiinit aamma kulturikkut ingerlatsinermut inunnillu qaammarsaanermut malittarisassat Naalakkersuisunit aalajangersagaasut malillugit atugassanngortissavaat init atortorissaarutillu allat pisariaqartitat, tamatumani ilanngullugit init atuarfiit, silami ingerlatsiviit inissallu tamanut ammasut allat.

§ 33, imm. 1-imi aalajangersarneqarpoq kommunalbestyrelsip ininut silamilu ingerlatsivinnut meeqqat inuusuttullu suliniaqatigiiffiinit pigineqartunut attartorneqartunulluunniit ingerlatsinermut tapiissuteqartarnissaa.

§ 33, imm. 3-mi aalajangersarneqarpoq kommunalbestyrelse ininut kulturikkut inunnillu qaammarsaanermi atugaasunut ingerlatsinermut tapiissuteqarsinnaasoq, tamatumani ilanngullugit ataatsimiittarfiit katersortarfiillu

§ 34, imm. 1-imi aalajangersarneqarpoq Naalakkersuisut init meeqqat inuusuttullu suliniaqatigiiffiinit atugassat pilersinnerinut iluarsarneqarnerinullu tapiissuteqarsinnaasut.

§ 34, stk. 3-mi aalajangersarneqarpoq Naalakkersuisut init kulturikkut ingerlatsinermut inunnillu qaammarsaanermut atugassat sananeqarnerannut, iluarsarnerinut aaqqissuunnerannullu tapiissuteqarsinnaapput, tamatumani ilanngullugit ataatsimiittarfiit katersortarfiillu.

Kiisalu tapiissutit pillugit peqqussummi § 35-mi aalajangersarneqarluni kommunalbestyrelse allalluunniit init timersortarfiilluunniit pilersitaanerannut iluarsarneqarnerannullu tapiissuteqarsimappata Naalakkersuisut tapiissutit ilaat utertillugit akilersinnaavaat.

§ 38-mi peqqussut manna malillugu tapiissutinut qanorlu allaffissornikkut aqunneqarnissaannut malittarisassiorsinnaanerannut Naalakkersuisut tunngavissinneqarput. Tamatumunnga atatillugu ukununnga allaffissornikkut najoqqutassaliortoqarpoq:

- Tusagassiutinut tapiissutit pillugit Namminersorlutik Oqartussat peqqussutaat nr. 19 8. oktober 2015-imeersoq.

§ 42, imm. 3-mi aalajangersarneqarpoq Sunngiffimmi sammisassaqartitsinermut ataatsimiititaliamik qinersineq pillugu Namminersornerullutik Oqartussat nalunaarutaat nr. 8, 5. april 1993-imeersoq 1. juli 2002 aallarnerfigalugu atorunnaartoq, kiisalu malittarisassat allat Inatsisartut peqqussutaanni eqqaaneqartumi imm. 1-imi taaneqartut atuutiinnassasut, allanngortinneqarnissaat, atorunnaarsinneqarnissaat imaluunniit taanna Inatsisartulluunniit peqqussutaannik allanik tunngavilinnik malittarisassanik taarserneqarnissaata tungaanut. Tassa imaappoq tamatumunnga atatillugu ukuninnga allaffissornikkut najoqqutassaliortoqartoq:

- Sunngiffimmi ilinniartitsinermi peqataanermut akiliuteqartitsisarneq pillugu Namminersornerullutik Oqartussat nalunaarutaat nr. 29, 27. juni 1994-imeersoq.

- Meeqqat inuusuttullu suliniaqatigiivinit init silamilu ingerlatsiviit pillugit Namminersornerullutik Oqartussat nalunaarutaat nr. 20, 27. september 1988-imeersaq.
- Ilinniartitsisut ráðii aamma kommunemi ilinniartitsisut siunnersuisoqatigiivi pillugit Namminersornerullutik Oqartussat nalunaarutaat nr. 18 16. maj 1989-imeersaq.
- Kalaallit Nunaanni Ilinniarnertuunngorniarfimmi ilinniartut pillugit Namminersornerullutik Oqartussat nalunaarutaat nr. 21, 5. august 1992-imeersaq.
- Fagini ataasiakkaani meeqqat atuarianni inaarutaasumik aammalu inaarutaasumik annertusisamik misilitsinnissamik siunertaqartunik atuartitsineq pillugu Namminersornerullutik Oqartussat nalunaarutaat nr. 37, 26. november 1993-imeersaq.
- Kalaallit Nunaanni Ilinniarnertuunngorniarfimmi ilinniartut pillugit nalunaarutip allanngortinneqarneranik Namminersornerullutik Oqartussat nalunaarutaat nr. 28, 27. juni 1994-imeersaq.
- Inersimasunut sunngiffimmi atuartitsinermi sammisassat suuneri pillugit Kaajallaasitaq nr. 23, 26. juni 1980-imeersaq
- Sunngiffinni klubbini siulersuisut pillugit Kaajallaasitaq nr. 31 21. oktober 1980-imeersaq.
- Sunngiffimmi sukisaarsaartarfinnut klubbinut kommunit ingerlatarinngisaanut ileqqoreqqusat imarisassat pillugit malittarisassanik Kaajallaasitaq nr. 1 14. januar 1981-imeersaq.
- Sunngiffimmi sammisassaqtitsinissamut kommunip pilersaarutaanik oqaasertaliinissamut maleruaqqusanut Kaajallaasitaq nr. 13, 4. september 1981-imeersaq.
- Kulturikkut inunnullu qaammarsaasoqarnissaanut kommunip pilersaarutaata oqaasertaliornissaanut maleruaqqusat pillugit Kaajallaasitaq nr. 15, 20. november 1981-imeersaq.
- Kalaallisut kalaallisut oqaluttuunngitsunut inersimasunut atuartitsineq pillugu Kaajallaasitaq nr. 2 25. april 1985-imeersaq.
- Kalaallit Nunaanni timersortarfiit pillugit assigiissaakkamik ileqqoreqqusat pillugit Kaajallaasitaq nr. 3, 2. oktober 1997-imeersaq.

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaattut siunnersuut nr. 16, 3. december 2012-meersaq Tassa inatsimmi § 32, imm. 3-mi aalajangersarneqarpoq: "Sunngiffimmi sammisaqartitsinerup aaqqissugaanera pillugu Inatsisartut inatsimmik atuuttuulersitsinissaasa tungaannut kommunalbestyrelsip suli pisussaaffigivaa meeqqat 7-iniik 15-inut ukiullit fritidshjemminut innersuuttarnissaat, tak. § 8, imm. 1. Kommunalbestyrelsi utaqqisunut allassimaffiliussappat meeqqat taakku ataatsimoortunut b-nut ilanngunneqassapput, tak. § 9, imm. 1, nr. 2."

Kulturikkut ingerlatsineq sunngiffimmi sammisassaqtitsineq pillugu nalunaarutikkut aaqqiissuteqarnerup saniatigut Aningaasanoorutit ilaannit iluanaarutinit agguaaassisarneq pillugu Inatsisartut Inatsisaat nr. 10, 22. november 2011-meersukku aamma

aaqqiissuteqartoqarpoq. Inatsimmi § 1, imm. 1-imi aalajangersarneqarpoq Aningaasanoorutit ilaat pillugit Kalaallit Nunaannut inatsit naapertorlugu pissarsiassat ukiumoortumik Kalaallit Nunaannut pisassanngortinneqartartut Naalakkersuisut tamanut iluaqutaasussamik siunertanut makkununga agguaatissagaat:

- 1) 50 %-ii timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu,
- 2) 9,1 %-ii piukkunnaatillit pikkorinnerillu timersornerinut,
- 3) 13,6 %-ii meeqqat inuusuttullu peqatigiiffiinut, aamma
- 4) 27,3 %-ii tamanut iluaqutaasussamik siunertanut allanut, taamatuttaaq kulturimut tunngatillugu siunertanut, inunnik qaammarsaanermut siunertanut, nappaatinik akiuiniarnermut pinaveersaartitsinermullu siunertanut, inooqatigiinnermut tunngasunut siunertanut, asimiititsinissamik siunertanut aamma tamanut iluaqutaasussamik ilisimatusarniarluni siunertanut.

Inatsimmi § 1, imm. 3-mi aalajangersarneqarpoq Naalakkersuisut aningaasaateqarfinnut suliniaqatigiiffinnullu allanut aningaasanoorutit ilaannit iluanaarutininik tamanut iluaqutaasussamik siunertanut agguaassisartunut imm. 1-imi taaneqartutut tamanut iluaqutaasussamik siunertanut tapiissuteqartoqarsinnaatillugu aningaasanik tunissuteqarnissaq pillugu isumaqatigiissuteqarsinnaapput. Aningaasanik tunissutissatut isumaqatigiissutigineqartut pissarsiassanit ukiumoortumik Kalaallit Nunaannut pisassanngortinneqartunit imm. 1-imi taaneqartunut agguaassisoqartinnagu ilanngaatigineqassapput.

Inatsimmi § 2, imm. 1-imi aalajangersarneqarpoq atugassanngortitat § 1, imm. 1-imi taaneqartut imatut agguanneqassasut:

- 1) atugassanngortitat § 1, imm. 1, nr. 1-imi taaneqartut Kalaallit Nunaanni Timersoqatigiit Kattuffiannut, timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu, agguasseqqinnermik isumaginnittussamut agguanneqassapput,
- 2) atugassanngortitat § 1, imm. 1, nr. 2-mi taaneqartut Elite Sport Greenlandimut, piukkunnaatillit pikkorinnerillu timersornerinut agguasseqqinnermik isumaginnittussamut agguanneqassapput,
- 3) atugassanngortitat § 1, imm. 1, nr. 3-mi taaneqartut Sorlammut, meeqqat inuusuttullu peqatigiiffiinut agguasseqqinnermik isumaginnittussamut agguanneqassapput, aamma
- 4) atugassanngortitat § 1, imm. 1, nr. 4-mi taaneqartut qinnuteqaateqartoqarneratigut Naalakkersuisunit agguanneqassapput.

§ 8-mi peqqussut malillugu malittarisassiorsinnaanerannut Naalakkersuisut tunngavissinneqarput. Aningaasanoorutit ilaannit aningaasanik agguaassisarneq pillugu tapeeriaatsit, tapiiffigineqarnissamut piunasaqaatit il.il. pillugit Namminersorlutik Oqartussat nalunaarutaat nr. 2, 26. januar 2015-imeersoq naapertorlugu Naalakkersuisut tassuuna tunngavissiipput.

2015-imut aningaasanut inatsimmi kulturikkut ingerlatsinermut sunngiffimmilu sammisassaqtitsinermut atungassanik aningaasanik immikkoortitsisoqarsimavoq, kulturikkut ingerlatsinermut sunngiffimmilu sammisassaqtitsinermut toqqaannartumik aningaasaliissutit imaluunniit kulturikkut ingerlatsinermut sunngiffimmilu sammisassaqtitsinermut siunnerfeqartumik aningaasaliissutit ilaatut. Aningaasaliissutit taakku kontoni pingaarnerni ukunani aningaasaliissutaapput:

40.90.10 CopyDanimut isumaqatigiissut

40.91.03 Pikkorissartitsineq

40.91.08 Kalaallisuuliornermik Ilinniarfik

40.92.11 Eqqumiitsuliornermik Ilinniarfik

40.94.10 NCB-mut akiliutinut utertitsinermut tapiissutit aamma nipilersuusiorneq

40.94.11 Nunatta Atuagaateqarfia

40.94.15 Kultureqarnermut tunngassuteqartunut isumaqatigiissutitigut pisussaaffigalugit tapiissutit

40.94.18 Katuaq

40.94.21 Danske Spil A/S-p tipsernermit lottonermillu kaaviiartitaanit Kalaallit Nunaata pissarsiaanit tapiissutit (Tapiissutit aningaasaliissutit)

40.94.22 Danske Spil A/S-imi kaaviiartitanit Kalaallit Nunaata pissarsiasai

40.94.26 Kanalini digitaliusuni pisinnaatitaanermut akiliutissat

40.95.01 Kulturimut tapiissutit allat

40.95.05 Nunatta Isiginnaartitsisarfia

Kalaallit Nunaata aamma eqqumiitsuliornermut piorsarsimassutsimik tunngasunik nunat tamat akornanni isumaqatigiissutinut arlalinnut ilaavoq. Taakku akornanni piorsarsimassutsimut makku immikkut pingaaruteqarput:

- Aningaasaqarneq, isumaginninnikkut kiisalu piorsarsimassutsikkut piginnittussaannermit FN-ip nunat tamalaat akornanni isumaqatigiissutaa 16. december 1966-imeersoq. Naalagaaffiit isumaqatigiissummut ilaasut innuttami aningaasatigut, isumaginninnikkut kulturikkullu pisinnaatitaaffiinik qulakkeerinnissallutik isumaqatigiissummi pisussaattippat.
- Piorsarsimassutsikkut takutitseriaatsit assigiinngisitaartuunerisa illersorneqarnissaat siuarsarneqarnissaallu pillugit UNESCO-mi isumaqatigiissut 20. oktober 2003-meersoq. Nunat piorsarsimassutsimut politikkeqarsinnaatitaanerannik isumaqatigiissummi ersarissarneqarpoq. Piorsarsimassutsip piorsarsimassuserlu pillugu politikkeqarnissap pingaarutai isumaqatigiissummi ersarissarneqarput, taamaalillunilu naalagaaffiit piorsarsimassutsikkut takutitseriaatsit assigiinngisitaartuunerisa illersorneqarnissaat siuarsarneqarnissaallu pillugit piginnaatitaallutik, pisussaallutik kiisalu periarfissiisussaallutik, matumanilu naalagaaffimmit tapiisarneq aamma eqqarsaatigalugu.
- Piorsarsimassutsikkut kingornussat tigussaangitsut illersorneqarnissaannut UNESCO-mi isumaqatigiissut 17. oktober 2003-meersoq. Isumaqatigiissutit siunertaraa piorsarsimassutsikkut kingornussat tigussaangitsut illersorneqarnissaat,



Taakku saniatigut kulturimut, ilinniartitaanermut ilisimatusarnermullu tunngasunik Island, Savalimmiut Kalaallillu Nunaata ukiunut pingasunut atuuttussamik isumaqatigiissuteqarput 3. november 2010-meersumik. Isumaqatigiissut kingorna ukiumik ataatsimik sivitsorneqarpoq. Avitseqatigiittarnissamik aaqqissuussinermi siunertaavoq nunani pingasuusuni eqqumiitsuliortut kulturikkullu suliaqartut nunani avannarlerni killerni allani imminnut isumassarsioqatigiittalernissat, nunamilu tiguisussami kulturikkut suliaqartunut ilisimasanik misilittakkanillu ingerlatitseqqittarnissaq. Island, Savalimmiut Kalaallillu Nunaat 2016-imi suleqatigiinnissamut nutaamik isumaqatigiissusiussapput.

Taamatuttaa q ilisimatitsissutigineqarsinnaavoq Kalaallit Nunaata Meeqqat Pisinnaatitaaffii pillugit Naalagaaffiit Peqatigiit Isumaqatigiissutaat 20. november 1989-imeersoq atuutsilermagu, tassani artikel 31-imi meeqqap ilaatigut pinnguarsinnaanera sunngiffimmilu soqutigisaminik sammisaqarsinnaanera meeqqap ukiuinut naapertuuttut, aamma kultureqarnikkut eqqumiitsuliornikkullu inuunermut killilersugaanani peqataasinnaanera eqqartorneqarlutik.

#### b) Siunnersuut

Siunnersuummi malittarisassat arlallit Kulturikkut ingerlatsinermik sunngiffimmilu sammisassaqaqtitsinermik peqqussummi malittarisassanik atuuttunik arlalinnik ingerlatitseqqinneruvoq. Tassungali atatillugu immikkut isiginiarneqarsimavoq siunnersuummi kulturikkut ingerlatsinermit sunngiffimmilu sammisassaqaqtitsinermit taamaallaat sammineqassasut, eqqumiitsuliornermut, timersornermut timigissarnermullu tunngasuunngitsoq, tassami taakku pillugit immikkut ittunik marlunnik inatsiseqartinneqassasut siunnersuutigineqarmat.

Siunnersuummi malittarisassat arlallit Kulturikkut ingerlatsinermik sunngiffimmilu sammisassaqaqtitsinermik peqqussummi malittarisassanik atuuttunik arlalinnit ingerlatitseqqinneruvoq. Taamaattoq Kulturikkut ingerlatsinermik sunngiffimmilu sammisassaqaqtitsinermik peqqussummi malittarisassanik annertuumik nutarterisoqarlunilu ersarissaasoqarpoq. Tassunga atatillugu eqqaaneqarsinnaapput

- atuuffia ersarissarneqarpoq, ilaatigut oqariartaatsinik pingaarnernik nassuiaasiornikkut
- aalajangersarneqarpoq inatsit kulturikkut ingerlatsinermik sunngiffimmilu sammisassaqaqtitsinermik atorineqassasoq
- Naalakkersuisut akisussaaffii pingaarnerit pillugit malittarisassiortoqarpoq

- Naalakkersuisut inatsit malillugu pisussaaffitik qanoq naammassissaneraat malittarisassiortoqarpoq
- aalajangersagaq kommunalbestyrelsip akisussaaffinut pingaarnernut tunngasut ersarissarneqarput itisilerneqarlutillu
- kommunemi kulturikkut ingerlatsinermik sunngiffimmilu sammisassaqtitsinermik tunngasumik kommunalbestyrelsip ukiumoortumik pilersaarumminik tamanut saqqummiussisussaataitanera pillugu aalajangersaasoqarpoq
- malittarisassiortoqarpoq kommunalbestyrelsip pisussaaffini inatsit malillugu qanoq malissanerai pillugit
- illuutitigut sinaakkutaasussat pillugit tapiissutinut aalajangersakkat ersarissarneqarput itisilerneqarlutillu
- immikkut inatsisitigut tunngavissiisoqarpoq Naalakkersuisut kommunalbestyrelsinik isumasioqatigeereerlutik sanaartukkanut, illuutunik, ininik sanaartukkanillu allanik aserfallatsaaliinermut ingerlatsinermullu tunngasunik kulturikkut ingerlatsinermik sunngiffimmilu sammisassaqtitsinermut atorqeartartunik tapiissuteqarnissamut malittarisassanik
- sammisassaqtitsinermut tapiisarnermut aalajangersakkat ersarissarneqarput itisilerneqarlutillu
- tapiissutinik agguassinermi sammisassat meeqqanut inuusuttunullu, inunnut aalaniarnermikkut killeqartunut inunnullu isumaginninnikkut aarlerinartorsiortunut isiginiarneqarnerunissaat pillugit Naalakkersuisunut kommunalbestyrelsinullu malittarisassiortoqarpoq.
- Kalaallit Nunaata avataani kulturikkut ingerlatsinermik sunngiffimmilu sammisassaqtitsinermik tunngasunik Naalakkersuisut tapiisinnaanerat inatsisitigut tunngavissinneqarpoq
- immikkut inatsisitigut tunngavissiisoqarpoq Naalakkersuisunut kommunalbestyrelsit oqaloqatigereerlugit kulturikkut ingerlatsinermik sunngiffimmilu sammisassaqtitsinermik tunngasunut tapiisarnermut malittarisassiornissaannut tunngasumik
- sunngiffimmi atuartitsineq ilinniarnissamut inuussutissarsiulernissamullu tunngavissiinngitsoq ersarissatigineqarpoq
- sunngiffimmi atuartitsinerit qanoq aaqqissuunneqarsinnaanerit sukaterneqarpoq, tassami inersimasunut højskolertitsinerit, faginik ataasiakkaanik atuartitsinerit, immikkut atuartitsinerit inuussutissarsiutinillu pikkorissarnerit peerneqarmata
- sunngiffimmi atuartitassanik eqimittanik pilersitsineq atorunnaarsitsinerlu pillugit akuersisarnermut malittarisassat pisariillisarneqarlutillu ersarissarneqarput
- sunngiffimmi atuartitsinermut peqataanissamut kommunalbestyrelsip akiliisitsisarnera pillugu aalajangersagaq allanngortinneqarpoq piumasaqaammiit periarfissatut
- sunngiffimmi atuartitsinermut peqataanissamut akiliisitsisoqarnissaanik malittarisassaq pillugu inatsisitigut tunngavik allanngortinneqarpoq piumasaqaammiit periarfissatut malittarisassiuunneqartariaqartutut

- sunngiffimmi ornittakkat pillugit malittarisassanik ilanngussisoqarpoq
- sunngiffimmi klubbinik atuneq ersarissarneqarpoq itisilernerqarlunilu
- sunngiffimmi klubbinik atuinermut akiligassap annertussusilernissaanik malittarisassanik aalajangersaanissamut inatsisitigut tunngavik annertusineqarpoq, Naalackersuisullu kommunalbestyrelsit isumasioqatigeerlugit malittarisassiortassapput
- timersornermut kattuffinnut tunngatillugu meeqqanut inuusuttunullu suliniaqatigiiffiit malittarisassiuunnissaannik inatsisitigut tunngavissisoqarpoq
- allaffissorneq pillugu immikkut kapitalimik aningaasalersuinissamullu tunngasumik ikkussisoqarpoq, uanilu nutaatut ikkussisoqarluni, tassa Naalackersuisut kulturikkut ingerlatsinermik sunngiffimmilu sammisassaqtitsinermik tunngasunik atungassanik tapiisinaanerat taakkununga atugassanik aningaasanik inatsimmi immikkoortitsinikkut
- naatsorsuutit naatsorsueqqissaartarnerlu pillugit malittarisassaliortoqarpoq
- ersarissarneqarpoq Naalackersuisut aalajangigaat allaffissornikkut oqartussamut allamut aamma ingerlateqqinneqarsinnaanngitsut. Naammagittaalliornissamut aalajangersakkat aamma ingerlateqqinneqarput.

Kulturikkut sunngiffimmilu sammisagaqtitsineq pillugu Inatsisartut peqqussutaannisulli misileraalluni aaqquissuussinernik Naalackersuisut pilersitsisinaanannut tunngavimmik ikkussisoqarpoq, tassunga ilanngullugu misileraalluni ingerlataqarnermut tapiissuteqarsinnaaneq.

Kommunit inatsimmik aqutsinerannik Naalackersuisut pingaarnertigut nakkutilliinerat aamma nakkutilliinermi suliap isumaginissaanut pisariaqartutut isigineqartunik paasissutissanik piunasaqarsinnaaneq aamma ingerlateqqinneqarluni.

Siunnersuut siunnersuutigineqarpoq ulloq 1. januar 2017-imi atuutilissasoq.

## 2.1 Atuuffia nassuiaatillu

Siunnersuummi § 1-imi inatsisip atuuffia killilernerqarpoq. Taamaalilluni Kulturikkut sunngiffimmilu sammisagaqtitsineq pillugu Inatsisartut inatsisaat atorneqassaaq. Tassunga atatillugu aalajangiunneqarpoq Inatsisartut inatsisaata kulturikkut sunngiffimmilu suliniutit siuarsassagai. Sumut atorneqarnissaa pillugu annerusumik paasitinniarlugu oqaatsit nassuiaataasut tassaniittut siunnersuummi § 1, imm. 2-4-mi nassuiarneqarput. Tassani pineqarput "kulturikkut sunngiffimmilu sammisassaqtitsineq", "innuttaasunik qaammarsaaneq" aamma "sunngiffik".

## 2.2 Akisussaaffinnik suliassanillu agguassineq

Siunnersuummi kapitali 2-mi pisortani oqartussat akisussaaffiisa suliassaasalu agguarneqarneri aalajangersarneqarput. Pisortani oqartussat tassaapput Naalackersuisut aamma kommunalbestyrelsit. Siunnersuummi § 2-mi aalajangersarneqarpoq Inatsisartut

inatsisaat manna naapertorlugu nunami tamarmi kulturikkut ingerlatsisoqarnissaanut sunngiffimmilu sammisassaqtitsisoqarnissaanut Naalakkersuisut pingaarnertut akisussaaffigigaat, tamannalu pillugu kommunalbestyrelsit suleqatiginerisigut akisussaaffinnik suliaassanillu agguaassisarnissamut pitsaasunik atugassaqtitsisoqassasoq.

§ 3-mi aalajangersarneqarpoq kommunalbestyrelse kommunimi kulturikkut ingerlatsinermut sunngiffimmilu sammisassaqtitsinermut pingaarnertut akisussaasuusoq kommunimilu innuttaasut kulturikkut neqerooruterpasuarnik inerisaaqataanissamut, ingerlatsinissamut atuinissamullu periarfissinneqarnissaat siunertaralugu anguniagassanik killiliussassanillu aalajangersaasussaalluni. Aalajangersagaq kulturikkut ingerlatsineq sunngiffimmilu sammisassaqtitsineq pillugu peqqussummi § 2, imm. 1-imit ingerlatitseqqinneruvoq. Taamaattoq oqaaseqatigiit kingulliit oqaaseqatigiinnut atuuttunut ersarissaataapput.

Siunnersuummi § 4-mi aalajangersarneqarpoq ukiut tamaasa kommunimi kulturikkut ingerlatsinissamut sunngiffimmilu sammisassaqtitsinissamut kommunalbestyrelse pilersaarusiortassasoq, taannalu tamanut kommunip nittartagaatigut saqqummiunneqartassasoq. Aalajangersagaq kulturikkut ingerlatsineq sunngiffimmilu sammisassaqtitsineq pillugu peqqussummi § 3, imm. 2-mit ingerlatitseqqinneruvoq, taamaattoq tamanut saqqummiussinissamik piumasagaat nutaajuvoq. Taamaaliornikkut qulakkearniarneqarpoq innuttaasut oqartussallu allat tamatuminnga ilisimanninnissaat. Aamma nutaatut ilanngunneqarpoq Naalakkersuisut pilersaarutip imassaanik ilusissaanillu malittarisassiornissaannik inatsisitigut tunngavissinneqarput.

Siunnersuummi § 5, imm. 1-imi aalajangersarneqarpoq Kommunalbestyrelsip inatsisartut inatsisaat naapertorlugu pisussaaffigai. Tamanna pissaaq naleqquttunik ineqartitsinissaq aamma illuutinik atugassaqtitsinissaq aamma ininut silamilu ingerlatsivinnut meeqqat inuusuttullu suliniaqatigiiffiinit pigineqartunut attartorneqartunulluunniit ingerlatsinermut tapiissuteqarnissakkut. Tamanna kulturikkut ingerlatsineq sunngiffimmilu sammisassaqtitsineq pillugu peqqussummi § 32 aamma § 33, imm. 1-imik ingerlatitseqqinneruvoq.

Siunnersuummi § 5, imm. 2-mi aalajangersarneqarpoq Kommunalbestyrelsip inatsisartut inatsisaat manna naapertorlugu pisussaaffini qanoq naammassissanerai. Tassani pineqarput illuutinik atugassaqtitsineq sammisallu. Tamanna kulturikkut ingerlatsineq sunngiffimmilu sammisassaqtitsineq pillugu peqqussummi § 33, imm. 3-mik ingerlatitseqqinneruvoq. Kulturikkut ingerlatsineq sunngiffimmilu sammisassaqtitsineq pillugu peqqussummi nutaajuvoq aamma eqqaaneqarmat kulturikkut ingerlatsinermik sunngiffimmilu sammisassaqtitsinermut atugassanik ininik illuutinillu naleqquttunik pissarsiniarnermi kommunalbestyrelsi ikiuussinnaasoq. Aamma nutaajuvoq eqqaaneqarmat kulturikkut ingerlatsinermi sunngiffimmilu sammisassaqtitsiniarnermi atorneqartussanik aningaasatigut kommunalbestyrelsi tapiissuteqarsinnaasoq allatigulluunniit pilersitsiniarnermi, atuinermi ingerlatitseqqinnissamilluunniit atungassanik.

§ 5, imm. 3-imi nutaatut Naalackersuisut tunngavissinneqarput imm. 1 naapertorlugu kommunalbestyrelsit ininut naapertuuttunik atugassarititanillu malittarisassiornissaannut.

Siunnersuummi § 6-imi sammineqarput kommunit agguarnerisa avataanni inatsisartut inatsisaat manna malillugu suliassanik kommunalbestyrelsimut isumagisassangortinneqarsimasunik Naalackersuisut isumaginnissasut. Tassani Kulturikkut ingerlatsineq sunngiffimmilu sammisassaqaqtitsineq pillugu peqqussummi § 3-mik ingerlatitseqqinneruvoq.

#### 2.4 Suliat tapiiffigineqarsinnaasut tapeeriaatsillu

Siunnersuummi §§ 7-8-mi sammineqarput Naalackersuisut aamma kommunalbestyrelsip illunik tapiisarneri. § 7, imm. 1-imi nassuiarneqarpoq illunik oqarnermi qanoq tamanna paasineqassanersoq. Kulturikkut ingerlatsineq sunngiffimmilu sammisassaqaqtitsineq pillugu peqqussummi § 34, imm. 1 aamma 3-mik ingerlatitseqqinneruvoq. Nutaartaali tassaavoq Naalackersuisut ingerlatsinermut aamma tapiissinnaammata. Kommunalborgestyprelsip tapiissinnaanerit eqqarsaatigalugu periarfissaavoq nutaaq pisussaaffinnut periarfissanullu tapertaasussat, taakku Kulturikkut ingerlatsineq sunngiffimmilu sammisassaqaqtitsineq pillugu peqqussummut atasuusimasut. § 7, imm. 2-mi aalajangersakkat, tassalu Naalackersuisut tapiissutinik tamakkiisumik ilaannakortumilluunniit utertitsinnaanerit kommunalborgestyprelsi allalluunniit tapiissuteqarnerannut tunngasoq Kulturikkut ingerlatsineq sunngiffimmilu sammisassaqaqtitsineq pillugu peqqussummi § 35-mik ingerlatitseqqinneruvoq, taamaattoq maanna aamma ilaatinneqalerluni ingerlatsinissamut tapiissuteqarsinnaaneq.

Siunnersuummi § 8-imi nutaatut Naalackersuisut periarfissinneqarput kommunalborgestyprelsi isumasioqatigereerlugu illunik ininillu tapiissuteqarnissamut malittarisassiorninnaanerit.

Siunnersuummi § 9-mi pineqarpoq sammisassaqaqtitsinernut tapiissutit. Aalajangersagaq Kulturikkut ingerlatsineq sunngiffimmilu sammisassaqaqtitsineq pillugu peqqussummi § 30-mut atatillugu annertusisaavoq. Nutaatut ikkunneqarpoq imm. 2-mi Naalackersuisut inatsisitigut tunngavissinneqaramik Kalaallit Nunaata avataani kulturikkut ingerlatsinermut sunngiffimmilu sammisassaqaqtitsinernut tapiissuteqarsinnaanerannut. Imm. 3-mi nutaatut ikkunneqarpoq Naalackersuisut kommunalborgestyprelsillu tapiissutinik tunniussinerminni sammisassat meeqqanik inuusuttunillu, inunnik timimikkut ajoquteqartunik aamma inuuniarnikkut ajornartorsiuteqartunik ilaatitsisut sapinngisamik salliutissagaat. Imm. 4-mi sammineqarpoq Naalackersuisut imm. 1 naapertorlugu tapiissutinik tunniussinerminni sammisassat nuna tamakkerlugu imaluunniit kommunini marlunni arlalinniluunniit ingerlanneqartussat sapinngisamik salliutissagaat, taannalu Kulturikkut ingerlatsineq sunngiffimmilu sammisassaqaqtitsineq pillugu peqqussummi § 30, imm. 2-mit ingerlatitseqqinneruvoq, minnerusumilli allannguilaarluni. Imm. 5-imi aamma taamaappoq, tassa naalackersuinikkut, upperisarsiornikkut sulisartoqarnermilluunniit peqatigiiffeqarnikkut

siunertarineqartunut tapiissuteqarsinnaannginnerat. Kulturikkut ingerlatsineq sunngiffimmilu sammisassaqaartitsineq pillugu peqqussummi § 40, imm. 4-mit ingerlatitseqqinneruvoq. Imm. 6-imi nutaatut ikkunneqarpoq Naalakkersuisut kommunalbestyrelsinik isumasioqateqareerlutik kulturikkut ingerlatsinerup sunngiffimmilu sammisassaqaartitsinerup iluini sammisassanut, tassunga ilanngullugit akisussaaffinnik suliasanillu agguassinissamut, ingerlatsinerup tapiiffiqarsinnaasup killilerneqarnissanut, piunasaqaatinut tapiissuteqarnissamullu piunasaqaatinut, qinnuteqarnissamut, naatsorsuuserinermut kukkunersiunermullu tapiissuteqarnissamut malittarisassaliorsinnaasut.

## 2.5 Sunngiffimmi atuartitsineq

Sunngiffimmi atuartitsinerup aalajangersakkat siunnersuummi kapitali 4-miittut kulturikkut ingerlatsineq sunngiffimmilu sammisassaqaartitsineq pillugu peqqussummi kapitali 3-mik ingerlateqqitaapput.

Siunnersuummi § 10, imm. 1-imi sunngiffimmi atuartitsineq pillugu nassuiaatini ersarissarneqarpoq sunngiffimmi atuartitsineq ilinniarnissamut inuussutissarsiulernissamullu tunniussisuunngitsoq. Inatsisip nutarternerani siunertat ilagaat piginnaaneqalissutaasumik atuartitsineq sunngiffimmi atuartitsinerup ilaatinneqassanngitsoq, taamaattoq ilinniartitaaneq pillugu inatsimmit aalajangersarneqassasoq.

Siunnersuummi § 10, imm. 2-mi aalajangersarneqarpoq sunngiffimmi atuartitsineq qanoq aaqjissuunneqassanersoq pillugu malittarisassat. Kulturikkut ingerlatsineq sunngiffimmilu sammisassaqaartitsineq pillugu peqqussummi § 4-mik ingerlatsineruvoq. Tassunga nassuiaasiornermi sukaterisoqarpoq, tassami inersimasunut højskolertitsisarneq, faginik ataasiakkaanik atuartitsineq, immikkut atuartitsineq inuussutissarsiutinillu pikkorissartarnerit peerneqarmata. Tassani pequtaavoq taakku inatsimmi allammi aalajangersarneqarmata.

Siunnersuummi §§ 11-19-imi aalajangersakkanik sammineqarput sunngiffimmi atuartitassanik pilersitsinerup atorunnaarsitsinerup akuersissuteqartarneq, kiisalu sunngiffimmi atuartsitsinerup ataasiakkaat qanoq paasisariaqarneri. Tassani pineqarput Kulturikkut ingerlatsineq sunngiffimmilu sammisassaqaartitsineq pillugu peqqussummi §§ 5-16-imi ingerlatitseqqinneq. Tassungali tunngatillugu anguniarneqarsimavoq periaaseq pisariinneq sunngiffimmi atuartissanik eqimattanik pilersitsiniarnerup piunasaqaatinut aalajangersakkanik tunngasunik pissutsinik arlalinnik katersiniarnerup.

Siunnersuummi § 19-imi pineqarpoq sunngiffimmi atuartitsinerup peqataanermut akiliutit allannngortinneqarneri, taamaalilluni periarfissaannanguinnassalluni, kulturikkut ingerlatsineq sunngiffimmilu sammisassaqaartitsineq pillugu peqqussummi § 16, imm. 1-imi tamanna kommunalbestyrelsimut pisussaatisuulluni. Siunnersuummi § 19, imm. 2-mi pisussaatisinerup aalajangersagaq aamma allannngortinneqarpoq, taamaalilluni Naalakkersuisut kisimik malittarisassiorsinnaallutik, kulturikkut ingerlatsineq sunngiffimmilu sammisassaqaartitsineq pillugu peqqussummi § 16, imm. 2 naapertorlugu pisussaaffiulluni.

## 2.6 Sunngiffimmi ornittagaq

Siunnersuummi §§ 20-31-imi aalajangersakkani sammineqarpoq sunngiffimmi ornittagaq.

Sunngiffimmi ornittakkat 1. januar 2009 tikillugu Ulluunerani paaqqinnittarfiit, ulluunerani angerlarsimaffimmi paaqqinniffiit il.il. pillugit Inatsisartut peqqussutaat nr. 7, 21. maj 2002-meersukkut aalajangersarneqarput. Peqqussimmi § 1, imm. 1-imi aalajangersarneqarpoq Kommunalbestyrelsi pisussaasoq meeqqanut 15-it inorlugit ukiulinnut paarineqarnissamik sunngiffimmiluunniit isumaginninnikkut perorsaanermik tunngaveqartumik pisariaqartitsisunut, ilanngullugit paarineqarnissamik pisariaqartitsinermik tunngaveqanngikkaluartumik pinaveersimatitsinissamillu siunertaqartumik sammisassaqaartinneqarnissamik pisariaqartitsisunut ulluunerani meeqqerivinni inissanik pisariaqartunik qulakkeerinnissalluni. Aalajangersakkamut nassuiaatini allaqqavoq ulluunerani paaqqinnittarfiit tassaasinnaasut meeraaqqeriviit, meeqqeriviit sunngiffimmilu paaqqinnittarfiit.

Ulluunerani paaqqinnittarfiit, ulluunerani angerlarsimaffimmi paaqqinniffiit il.il. pillugit Inatsisartut peqqussutaat Meeqqanut suli atualinngitsunut perorsaanikkut inerikkiartuutaasunik ulluunerani neqerooruteqartarpeq pillugu Inatsisartut peqqussutaat nr. 10, 5. december 2008-meersup atuutilerneratigut atorunnaarsinneqarpoq. Peqqussutip atuuffianut nassuiaammi allaqqavoq meeqqat suli atualinngitsut tassaapput meeqqat 0-miit 6-inut ukiullit, imaluunniit atuarfik pillugu peqqussut naapertorlugu atuartitaasussaataa nerup aallartinnera tikillugu tassani pineqartut. Peqqussummi meeqqat 15-inik ukiullit ilanngullugit ilaatinneqarunnaarmata sunngiffimmili ornittakkat inatsisitigut atuutiinnarnissaat kissaatigineqarluni peqqussummi § 31, imm. 3-mik ikaarsaariarnermi aalajangersakkamik ilanngussisoqarpoq. Ima aalajangersaasoqarpoq: "Sunngiffimmi sammisqaartitsinerup aqqissugaanera pillugu Inatsisartut peqqussummik atuuttuulersitsinissaasa tungaannut kommunalbestyrelsip suli pisussaaffigivaa meeqqat 7-iniik 15-inut ukiullit fritidshjemminut innersuuttarnissaat, tak. § 9, imm. 1. Kommunalbestyrelsi utaqqisunut allassimaffiliussappat meeqqat taakku ataatsimoortunut b-nut ilanngunneqassapput, tak. § 10, imm. 1, nr. 2." Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaat nr. 16, 3. december 2012-meersumik atuutilersitsinikkut ikaarsaariarnermi aalajangersagaq § 32, imm. 3 ingerlateqqinneqarpoq.

Siunnersuummi sunngiffimmi ornittagaq pillugu aalajangersagaliortoqarpoq. Taakku meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaanni ilaasunik malittarisassiornikkut suliarineqarput.

Tassa siunnersuummi aalajangersakkat ilanngunneqartut tassaapput sunngiffimmi ornittakkat qanoq paasineqarnissaat, aqqissuusseriaaseq, illuutit qanoq isikkoqarnissaannik sinaakkutissat, akuerseriaatsit, atorneri, akiliisussaataaneq, pilersitsineq, atuutsitsiunnaarnerlu, ingerlaavartumik nalilersuineq kiisalu sunngiffimmi ornittakkamiit

neqeroorummut allamut ikaarsaariarneq. Aamma Naalackersuisut kommunalbestyrelsimik isumasiuereernikkut sunngiffimmi ornittakkami aqutsineq allaffissornerlu pillugu, matumani ilaatigut piginnaasanik piumasaqaatit, sulisut qassiunissaat atuisussallu pillugit malittarisassiorsinnaapput.

## 2.7 Sunngiffimmi klubbit

Siunnersuummi §§ 32-35-mi pineqarput sunngiffimmi klubbit.

Aalajangersakkat Kulturikkut ingerlatsinermik sunngiffimmilu sammisassaqtitsinermi peqqussummi kapitali 4-mi aalajangersakkanik atuuttunik annerusumik ingerlatitseqqinneruvoq. Nutaatut ersarissarneqarpoq sunngiffimmi ornittakkanik atuineq akeqarunnaassasoq.

## 2.8 Meeqqanut inuussuttunullu suliniaqatigiiffiit

Siunnersuummi kapitali 7-imi meeqqanut inuussuttunullu suliniaqatigiiffiit pillugit malittarisassanik aalajangersuiffigineqarput, matumani ilaalluni suliniaqatigiiffiit tamakku qanoq paasisariaqarnerinik. Tassa Kulturikkut ingerlatsinermik sunngiffimmilu sammisassaqtitsinermi peqqussummit §§ 21-23-mik ingerlatitseqqinneruvoq. Nutaatut aalajangersakkamik ilanngussisoqarpoq, tassa timersoqatigiiffinnut kattuffinnut tunngasunik killiliinissamut Naalackersuisut malittarisassiorsinnaammata.

## 2.9 Aningaasalersuineq allaffissornerlu

Siunnersuummi kapitali 8-mi aningaasalersuineq allaffissornerlu pillugit maleruagassanik aalajangersaasoqarpoq, tassani aalajangersarneqarluni kulturimik sunngiffimmilu ingerlatanik aningaasartuutit tamarmik kommunimit akilerneqassapput, aningaasartuutit tamakkiisumik ilaannakuusumilluunniit Namminersorlutik Oqartussanit allaniilluunniit akilerneqartussaasut pillugit erseqqissumik inatsisitigut tunngavissaqanngippat. Aammattaaq suliasat inatsisitigut pisussaaffilerneqartut akilersillugit suliarineqartarnissaat pillugit Namminersorlutik Oqartussat kommunillu isumaqatigiissusiorsinnaanerat aalajangersarneqarpoq. Aammattaaq aalajangersarneqarpoq kommunit agguarnerisa avataanni aningaasartuutit Naalackersuisunit isumagineqartassasut. Maleruagassat taakku kulturikkut ingerlatsineq sunngiffimmilu sammisassaqtitsineq pillugit peqqussummi § 37-mik nangitsinerupput. Nutaatut Naalackersuisut kulturikkut ingerlatsinermut sunngiffimmilu sammisassaqtitsinermut tapiissutaat taakkununga aningaasaliissutaasut aningaasanut inatsimmi aalajangersarneqartut iluini aalajangersarneqarmata erseqqissarneqarpoq.

## 2.10 Naatsorsuutit kukkunersiunerlu

Siunnersuummi kapitali 9-mi naatsorsuutinut kukkunersiuinissamullu aalajangersagaqarpoq, tassanilu ilaavoq tapiissutit aningaasaliissutigineqartunut atorneqarsimanerat, tapiissutillu arlaannik pisoqarsimatillugu tamakkiisumik ilaannakortumilluunniit uterteqquneqarsinnaanerit uppersarneqartassasoq.



Taamatuttaaqp tapiissutigineqartut sunut atorneqarsimanerannut uppernarsaanissaq pillugu Naalakkersuisut aalajangersaasinnaaneranun aalajangersagaqarpoq, tassungalu ilaavoq naatsorsuutini kukkunersuiunernillu tunniussaqaartarnissamik piunasaqarneq aamma tapiissutini utertitsisoqarnissaa pillugu maleruagassaqaarneq.

#### 2.11 Maalaaruteqarsinnaaneq

Siunnersuummi § 42, imm. 1-imi aalajangersarneqarpoq inatsisit una naapertorlugu Naalakkersuisut aamma kommunalbestyrelsi aalajangiineri allaffissornikkut oqartussanut allanut maalaarutigineqarsinnaanngitsut.

Aalajangersagaq kulturikkut ingerlatsineq sunngiffimmi sammisassaqaartitsineq pillugit peqqussummi § 40-mik ingerlatitseqqinneruvoq. Taamaattorli nutaajuvoq Naalakkersuisut aalajangiineri allaffissornikkut oqartussaaffimmut allanut aamma maalaarutigineqarsinnaannginnerisa aalajangersarneqarsimammat. Tamannali periuserineqartunik katersuineruvoq.

#### 2.12 Misileraalluni aqqissuussinerit

Siunnersuummi kapitali 11-mi misileraalluni aqqissuussinissanut periarfissat pillugit maleruagassanik aalajangersaasoqarpoq, tassunga ilanngullugu taakkununga tapiissuteqarsinnaanermut periarfissat pillugit. Tamanna taakku pillugit Kulturikkut ingerlatsineq sunngiffimmi sammisassaqaartitsineq pillugit peqqussummi § 39-mi maleruagassanik ingerlatitseqqinneruvoq.

#### 2.13 Nakkutilliineq

Siunnersuummi § 44-mi aalajangersarneqarpoq kommunit inatsimmik aqutsinerannik Naalakkersuisut pingaarnertigut nakkutilliissasut aamma inatsit malillugu suliaassanik isumaginninnissanut pisariaqartutut isigineqartunik paasissutissanik kommunalbestyrelsimut piunasaqarsinnaallutik. Tamanna kulturikkut ingerlatsineq sunngiffimmi sammisassaqaartitsineq pillugit peqqussummi § 36-mik ingerlatitseqqinneruvoq. Nutaatulli erseqqissarneqarpoq kommunalbestyrelsi inatsimmik qanoq aqutsineranut Naalakkersuisut pingaarnermik nakkutilliisussaataasut. Tamannali periuserineqartunik katersuineruvoq.

#### 2.14 Atuutilersitsineq

Siunnersuummi kapitali 13-imi atuutilersitsinissaq, nuussineq atorunnaarsitsinerlu pillugit aalajangersaasoqarpoq. Taamaallunilu aalajangersarneqarpoq Inatsisartut inatsisaat 1. januar 2017 atuutilissasoq.

Aalajangersarneqarportaaq kultureqaarneq sunngiffimmi sammisassaqaartitsineq pillugit Inatsisartut peqqussutaat atuuttoq aamma sunngiffimmi sammisassaqaartitsineq pillugu Inatsisartut peqqussutaat nr. 5, 9. april 1992-imeersumi §§ 9-10 timersornermut timigissarnermillu tunngasortaasigut atuukkunnaarsinneqassasut.

Kiisalu aalajangersarneqarpoq aalajangersakkat Kulturikkut ingerlatsineq sunngiffimmilu sammisassaqtitsineq pillugit Inatsisartut peqqussutaat nr. 10, 21. maj 2002-meersoq naapertorlugu aalajangersarneqartut imaluunniit atuutsinneqartut atuutiinnassammata inatsisartut inatsisaanni imaluunniit inatsisini allani maleruaqqusat aalajangersarneqartut atorunnaarsinnissaat taarserneqarnissaalluunniit tikillugu.

### **3. Pisortanut aningaasaqarnikkut allaffissornikkullu kingunissai**

Siunnersuut aningaasaqarnikkut allaffissornikkullu pisortanut sunniuteqartussatut nalilerneqanngilaq.

Siunnersuut taamaalilluni Naalakkersuisuni kommunalbestyrelsinilu akisussaanermik piginnaatitsinermillu agguataarinernik Kulturikkut ingerlatsineq sunngiffimmilu sammisassaqtitsineq pillugit peqqussummi atuutsinneqartunik ingerlatitseqqinneruvoq.

Naalakkersuisulli susassaqarfimmi pingaarnertigut akisussaaffiannut, Naalakkersuisullu qanoq iliorlutik Inatsisartut inatsisaat naapertorlugu pisussaaffimminnik naammassinnissinnaanerannut siunnersuummi § 2-mi aalajangersakkamik nutaatut ilanngussisoqarsimavoq. Tamanna periutsinik katersuineramik oqariartuuteqarneruvoq, Naalakkersuisunullu tamakkiisumik pisussaaffittut kinguneqartussaananani. Taamaalilluni taamaallaat aalajangersarneqarpoq kultureqarnermut sunngiffimmilu sammisassaqtitsinermut pitsaasumik atugassaqtitsinissap piviusunngortinnissaanut Naalakkersuisut peqataassasut, Naalakkersuisullu periutsit naatsorsorluakkat ersarinnerusut malillugit pisussaaffimminnik malinnissasut.

Nutaatullu siunnersuummi § 9, imm. 3-mi Naalakkersuisut kommunalbestyrelsillu kultureqarnikkut sunngiffimmilu sammisassaqtitsinikkut sammisassanut tapiissutinik tunniussinissaminni sapinngisamik sammisassat meeqqanit inuusuttuniillu, inunnit avatimikkut akornutilinniit aamma inuttut atugarliortuniit peqataaffigisassat immikkut qiviartarnissaat pillugit aalajangersakkamik ilanngussisoqarpoq. Tamanna immi aningaasartuuteqarnerunermik kinguneqassanngilaq, tassami taamatut pisussaaffeqarneq aningaasaliissutaasunut killiliussani tullerijaaarinissami malinneqarsinnaassamat.

Siunnersuummi sunngiffimmi ornigarneqartartut pillugit aalajangersakkanik ilanngussisoqarpoq. Taakkununga aalajangersakkat meeqqat atuarfianni aallartinnginnermi meeqqanut ulluunerani neqeroorutinut perorsaanikkut ineriartortitsiffiusunut maleruaqqusanik aallaaveqarput, ullorlu manna tikillugu periuserineqartunik katersuiffittut isigisariaqarluni, taamaammallu aalajangersakkat aningaasartuuteqarnerunissamik kinguneqartussaananik.

### **4 Inuussutissarsiortunut aningaasaqarnikkut allaffissornikkullu kingunerisassat**

Inatsisissatut siunnersuut inuussutissarsiutinik ingerlataqartunut aningaasaqarnikkut allaffissornikkullu sunniuteqarnissaa ilimagineqanngilaq.

## **5 Avatangiisinut, pinngortitamut innuttaasullu peqqissusaannut kinguneri**

Siunnersuut avatangiisinut imaluunniit pinngortitamut kinguneqartitsinissaa naatsorsuutigineqanngilaq.

Siunnersuut inuit peqqissusaannut ajunngitsumik sunniuteqartussatut ilimagineqarpoq, tassami kulturikkut sunngiffimmilu sammisassaqaartitsinernut peqataasarnerit inuit ataasiakkaat inuunerinnissaannut iluaqutaasussaassammata.

## **6 Innuttaasunut kinguneri**

Innuttaasut kulturikkut sunngiffimmilu sammisassaqaartitsinikkut pisortat akisussaanerat, piginnaatitsinerat suliaassaallu erseqqinnerusumik misigisaqarfingilissavaat.

Siunnersuummi § 9, imm. 3-mi aalajangersagaq Naalakkersuisut kommunalbestyrelsillu kultureqarnikkut sunngiffimmilu sammisassaqaartitsinikkut sammisassanut tapiissutinik tunniussinissaminni sapinngisamik sammisassat meeqqanit inuusuttuniillu, inunnit avatimikkut akornutilinniit aamma inuttut atugarliortuniit peqataaffigisassat immikkut qiviartarnissaannik pisussaaffiliisoq sullitassat taakkua pitsaanagerusumik atugassaqaalernissaannik kinguneqartussatut ilimagineqarpoq.

Siunnersuummi § 4, imm. 1-imi oqaaseqatigiinni kingullermi aalajangersagaq kommunalbestyrelsip kommunimi kultureqarnikkut sunngiffimmilu sammisassaqaartitsinikkut ukiumoortumik pilersaarutaata tamanut saqqummiunneqartarnissaanik imaqartoq kommunip susassaqaarfimmut pilersaarutaanut inuit paasisaqarnerulernissaannik kinguneqartussatut ilimagisariaqarpoq.

Siunnersuummi kapitali 5-imi sunngiffimmi ornigarneqartartut pillugit aalajangersagaq sunngiffimmi ornigarneqartartup qanoq paasisariaqarneranut, sunngiffimmi ornigarneqartartup sunik suliaqarnissaanut, sunngiffimmi ornigarneqartartup qanoq ingerlanneqarsinnaaneranut, sunngiffimmi ornigarneqartartup illutaanut sunik piunasaqartoqarnissaanut, sunngiffimmi ornigarneqartartup atornissaanut maleruaqqusat suut atuunnerannut, tiguneqarnissamat anisitaanissamullu maleruaqqusat suut atuunnerannut qanorlu meeqqap inuusuttulluunniit ineriartornerata nalilernissaanut erseqqinnerusumik nassuiaasoqarpoq.

## **7 Pingaarutilittut kinguneqaataasinnaasut allat**

Siunnersuut naatsorsuutigineqanngilaq allatigut annertuunik kinguneqassasoq.

## **8 Oqartussaasut kattuffillu tusarniaaffigineqarnerat**

Inatsisissatut siunnersuut piffissami 17. december 2015 - 21. januar 2016 tusarniaassutigineqarpoq.

Siunnersuut tusarniaaffigisani ukunani tusarniaassutigineqarpoq:

Naalackersuisut Siulittaasuata Naalackersuisoqarfia	Peqqinnissamut Naalackersuisoqarfik
Ineqarnermut, Sanaartornermut Attaveqarnermullu Naalackersuisoqarfik	Aningaasaqarnermut Naalackersuisoqarfik
Aatsitassanut Ikummatissanullu Naalackersuisoqarfik	Aalisarnermut, Piniarnermut Nunalerinermullu Naalackersuisoqarfik
Inuussutissarsiornermut, Suliffeqarnermut Niuernermullu Naalackersuisoqarfik	Ilaqutariinnermut, Naligiissitaanermut Isumaginninnermullu Naalackersuisoqarfik
Pinngortitamut, Avatangiisinut Inatsisinillu Atuutsitsinermit Naalackersuisoqarfik	Nunanut Allanut Pisortaqaqarfik
KANUKOKA	Kommune Kujalleq
Kommuneqarfik Sermersooq	Qeqqata kommune:
Qaasuitsup Kommunea	KANUNUPE
Perorsaasut Peqatigiiffiat	KNAPK
Eqqumiitsuliornikkut Pinngorartitsisut Ingerlatsisullu (EPI)	Erinarsoqatigiit kattuffiat
Film gl	KIMIK
Kalaallit Atuakkiortut	Kalaallit Nunaanni Nipilersortartut Kattuffiat
Qeqqata Erinarsoqatigiissui	Nunatta Atuagaateqarfia
Kalaallit Nunaata Katersugaasivia Allagaateqarfialu	Katersugaasiveqarnermut Ataatsimiititaliaq
Nunatsinni Katersugaasiviit Kattuffiat, NUKAKA	NAPA
Katuaq	Taseralik
Sermermiut	Kalaallit Nunaata Isiginnaartitsisarfia
Sulisartut Højskoliat	Knud Rasmussenip Højskolia
Avannaani Ilinniarnertuunngorniarfik/Nordgrønlands Gymnasium	Qeqqani Ilinniarnertuunngorniarfik/Midtgrønlands Gymnasiale Skole
Kalaallit Nunaanni Teknikimik Ilinniarfik (KTI)	Campus Kujalleq
INULI	Imarsiornermik Ilinniarfik
NI-Nuuk	Peqqissaanermik Ilinniarfik
Ilisimatusarfik	Perorsaanermik Ilinniarfik
Savaatilinnngorniat Ilinniarfiat/Fåreholderskolen	Imarsiornermik Ilinniarfik
Eqqumiitsuliornermik Ilinniarfik	NUSUKA
Kalaallit Nunaanni Sulisitsisut (GA)	SIK
ASG	IMAK
AK	Perorsaasut Peqatigiiffiat NPK
ILI ILI	Avalak
Oqaatsinik Pikkorissarfik	MIO
Inuit Pisinnaatitaaffiit Kalaallit Nunaata Siunnersuisoqatigiivi	Kalaallit Nunaanni Naalagaaffiup Aallartitaa
pr.gl	MIBB (Meeqqat Inuunerissut)

Meeqqat inuusuttullu pillugit suliniaqatigiiffik NANU	Sorlak
Timersoqatigiiffiit Kattuffiat	Elite Sport Greenland
ICC	Visit Greenland
Siunnersuisartunik Ilinniarfik	Oqaatsinik Pikkorissarfik:
Sermitsiaq/AG	Kalaallit Nunaata Isiginnaartitsisarfia

Tusarniaanermi akissutit 18-it tiguneqarput, taakkunannga uku oqaaseqaateqarsimanatik:

Ilaqutariinnermut, Naligiissitaanermut Isumaginninnermullu Naalackersuisoqarfik, Peqqissutsimut Naalackersuisoqarfik, Nunanut Allanut Pisortaqarfik, Rigsombudsmanden i Grønland, Qeqqata Kommunia, ICC Greenland, Inuussutissarsiornermut, Suliffeqarnermut Niuernermullu Naalackersuisoqarfik.

Tusarniaaffigineqartut uku siunnersuummut oqaaseqaateqarput: Meeqqat illersuisuat MIO, KANUKOKA, Qaasuitsup Kommunia, Kalaallit Nunaanni Katersugaasiviit Kattuffiat (NUKAKA), Kalaallit Nunaanni Sulisitsisut (GE), SIK, ASG, IMAK, Kalaallit Nunaanni Eqqumiitsuliortut Kattuffiat (KIMIK), Kalaallit Nunaata Isiginnaartitsisarfia, Eqqumiitsuliornikkut Pinngorartitsisut Ingerlatsisullu (EPI) aamma Juunarsip Atuarfia Qasigiannuaniittumi atuarfimmi pisortaaneq.

Tusarniaanermut akissutit siunnersuummi aamma Inatsisartut Allattoqarfianni inatsisissamut oqaaseqaatit tassungalu atallutik oqaaseqaatini allanngortitsinissanut ataasiakkaanut pissutissaqalersitsisimapput.

§ 10, imm. 1-imi ”piginnaanngorsaataanngitsumik atuartitsineq” imaalillugu allanngortinneqarpoq ”ilinnialernissamut inuussutissarsiulernissamullu piginnaanngorsaataanngitsumik atuartitsineq”. Taamaaliortoqarpoq erseqqissarniarlugu piginnaanngorsaataasumik atuartitsinerit allat Inatsisartut inatsiaannut sulii ilaammata. Kingunerisaatut § 1, imm. 1 uanngaanniit ”piginnaanngorsaataanngitsumik sunngiffimmi atuartitsineq” uunga "sunngiffimmi atuartitsineq" allanngortinneqarpoq, tassami sunngiffimmi atuartitsineq erseqqinnerusumik § 10, imm. 1-imi nassuiarneqarmat.

§ 26, imm. 3-mi § 27, imm. 4-mut innersuussineq ilassutigineqarpoq. Taamaaliortoqarpoq erseqqissarniarlugu sunngiffimmi ornittakkanut namminersortunut tiguneqarnissamut piginaatitaaffimmi meeqqat tigunissaannut itigartitsinnaatitaaneq ilaanngimmat, tassa sunngiffimmi ornittakkami inissaqarsimappat.

§ 45, imm. 2-mi erseqqissarneqarpoq Kulturikkut ingerlatsineq sunngiffimmilu sammisassaqaartitsineq pillugit Inatsisartut peqqussutaat nr. 10, 21. maj 2002-meersumik atuukkunnaarsitsineq taamaallaat timersornermut timigissarnermullu tunngasortarinngisaanut atuummat. Tamatumunnga pissutaavoq timersorneq timigissarnerlu inatsisissatut siunnersuummut ilaanngimmata. Tassunga atatillugu oqaatigineqassaaq timersorneq

timigissarnerlu siunissami timersorneq timigissarnerlu pillugit Inatsisartut inatsisissaattut siunnersuummut peqatigitillugit malittarisassaqaqtitaalissasut naatsorsuutigineqarmat.

Tusarniaanermut akissutinut taakkulu oqaaseqarfigineqarnerannut tunngatillugu tusarniaanermut akissutinut allakkiarineqarsimasoq, ilanngussa 1, innersuutigineqassaartaaq.

## **Inatsisissamut siunnersuummi aalajangersakkanut ataasiakkaanut oqaaseqaatit**

### *§ 1-imut*

Imm. 1-imut

Atuuffia pillugu aalajangersagaq marloqiusamik siunertaqarpoq, tassa atuuffia killilerniarlugu aamma inatsisartut inatsisaanni pingaarnertut siunertaq suunersoq paaseqqullugu.

"Kulturikkut ingerlatsineq sunngiffimmilu sammisassaqaqtitsineq"-up nassuiarnera killiliinermik ulloq manna tikillugu Kultureqarnermut sunngiffimmilu sammisassaqaqtitsinermit aqqissuussinikkut ingerlanneqarsimasumik aallaaveqarpoq. Taamaattoq eqqumiitsuliorneq, timersorneq, højskolertitsineq, najukkani katersugaasiveqarneq aamma atuagaateqarfinnik ingerlatsineq inatsisit allat aqqutigalugit iluarsiivigineqarnissaat siunnersuutaammat taaneqanngillat.

Inuit qaammarsaavigineqarnerat susassaqaqtittut kulturikkut ingerlatsinermit sunngiffimmilu sammisassaqaqtitsinermit ilaasutut erseqqissaaffigineqarpoq, tamannalu ulloq manna tikillugu oqaariaatsimut kulturikkut ingerlatsinermit sunngiffimmilu sammisassaqaqtitsinermit ilaasimagaluarpoq. Tamannalu tunngavigalugu inunnut qaammarsaaneq § 1, imm. 3-mi nassuiarneqarpoq.

Tamakku saniatigut aqqissuussinerit kulturimik imaqaqtut, sunngiffimmilu kulturikkut sammisassaqaqtitsinerit nalinginnaassut taaneqarput, soorlu piginnaangorsarfiunngitsumik sunngiffimmi atuartitsinerit, sunngiffimmi ornigarneqaqtartut assigiinngitsut aamma meeqqat inuusuttullu suliniaqatigiiffii. Sammisassat tamarmik sunngiffimmi sammineqartarput, taamaammallu siunnersuummi § 1, imm. 4-mi sunngiffik nassuiarneqarpoq.

Imm. 2-mut

Aalajangersakkami nassuiarneqarpoq kulturikkut ingerlatsineq sunngiffimmilu sammisassaqaqtitsineq qanoq paasisariaqarnersut.

Tamatamani siullertut inunnut qaammarsaaneq pineqarpoq, tamannalu siunnersuummi imm. 3-mi nassuiarneqarpoq.

Aappaattut pineqarpoq aqqissuussinerit kulturimik imaqartinneqartut. Tassani assersuutaasinnaapput inuiattut ullorsiornerit, kulturip unnuaani sammisassaqtitsinerit, festivalit, illoqarfinni nuannatsitsinerit, illoqarfinni pisimasut aallaavigalugit angalaartitsinerit, peqatigiiffiit aqqissuussinerat il.il.

Pingajuattut sunngiffimmi kulturikkut sammisassaqtitsinerit nalinginnaasut allat pineqarput, soorlu piginnaangorsarfiunngitsumik sunngiffimmi atuartitsinerit, sunngiffimmi ornigarneqartartut assigiinngitsut aamma meeqqat inuusuttullu suliniaqatigiiffii. Aalajangersakkami kapitali 4-7-imut innersuussisoqarpoq, pissutsimmi taakkua ersarinnerusumik nassuiaaffigineqarput.

Imm. 3-mut

Inunnik qaammarsaaneq qanoq paasisariaqarnerisooq aalajangersakkatigut nassuiarneqarpoq. Nassuiaasoqarnerani qanoq inunnik qaammarsaanermi sammisassat suusinnaanersut, taakkunanilu inunnik qaammarsaanertut taaneqarsinnaalerlutik suut siunertaanersut nassuiarneqarput. Tamatumani qitiuvoq siullermik innuttaasup inuiaqatigiinni nammineq peqataasinnaaneranik siunertaqarneq, aappaattullu innuttaasup suliatigut kulturikkullu paasinninnerulernissaanut pisinnaasaqarnerulernissaanullu periarfissaqarneranik siunertaqartoq.

Imm. 4-mut

Sunngiffik qanoq paasisariaqarnera aalajangersakkatigut nassuiarneqarpoq. Nassuiaaneq sammisassanut arlaatigut ilinniarnertut sulinertulluunniit ilaasutut sanilliullugu ajortumik killiliinertut atorineqarpoq.

Imm. 5-imut

Aalajangersagaq imm. 1-imi sumut atorineqarnissaani ajunngitsumik killiliinermut aamma imm. 2-4-mi nassuiaatinut ajunngitsumik killiliinernut peqatigitillugu inatsisartut inatsisaanni atuuffinnut killiliivoq. Kultureqarnermut sunngiffimmilu sammisassaqtitsineq inatsisit allat aqutugalugit tunngaveqartinneqartoq tassaasinnaapput radiomik tv-millu ingerlatsineq pillugu inatsit, atuagaateqarfeqarneq pillugu inatsit, katersugaasiveqarneq pillugu inatsit, tamannalu pillugu tunngaviusumik inatsisissatut siunnersuutip saqqummiunneqartup akuersissutigineqarnerani eqqumiitsuliornermik ingerlataqarneq aamma timersorneq timigissarnerlu pillugit inatsisit.

## § 2-mut

Imm. 1-imut

Aalajangersagaq nutaajuvoq, Naalakkersuisullu nuna tamakkerlugu kulturikkut ingerlatsinermut sunngiffimmilu sammisassaqtitsinermut pingaarnertut akisussaasuunerisa aalajangersarnissaa siunertarineqarluni.

”kulturikkut sunngiffimmilu sammisassaqtitsisoqassaaq”-mik oqaasertaliinikkut siunertaavoq qulakkeerneqassasoq innuttaasut kultureqarnermut sunngiffimmullu tunngasunik neqeroorfigineqartassasut.

Akisussaaneq taanna kommunit inatsisartut inatsisaat naapertorlugu suliassaminnik isumaginninnissaasa qulakkeerneqarneratigut, Naalakkersuisullu namminneq iliuseqarnissaasa qulakkeerneqarneratigut isumagineqartussaavoq. Kingullermut tunngatillugu inatsimmi § 2, imm. 2-mi aalajangersakkatigut aalajangersarneqarpoq Naalakkersuisut qanoq isillutik pisussaaffimminnik inatsit naapertorlugu naammassinnissanersut.

Imm. 2-mut

Aalajangersagaq nutaajuvoq, tassanilu aalajangersarneqarpoq Naalakkersuisut qanoq isillutik inatsisartut inatsisaat naapertorlugu pisussaaffimminnik naammassinnissanersut. Inatsisartut inatsisaat naapertorlugu pisussaaffiliinerni pingaartumik pineqarput pisussaaffiit § 6, imm. 1-imi aamma § 9, imm. 3-5-imi aalajangersarneqartut.

Imm. 1-imi erserpoq Naalakkersuisut aningaasatigut tapiissuteqarsinnaasut allatigulluunniit kulturikkut sunngiffimmilu sammisassaqtitsinissamut ineriartortitsinissamik suliaqarnissamillu, ingerlatsinissamik, atuinissamik paasititsiniaanissamillu kajumissuseqalersitsinissaasut. "Allatigulluunniit kajumissuseqalersitsinissaasut"-mik oqarnermi tamanna pillugu naalakkersuinikkut oqaasertalersuineq, paasititsiniaanerit, piumassuseqalersitsinerit sukkanerusumillu suleqqusineq aqquataasinnaapput.

Nr. 2-mi takuneqarsinnaavoq Naalakkersuisut ininik tulluurtunik allatigullu najugaqarfissanik pissarsiniarnissamut peqataasinnaasut. Taamatuttaaq nr. 3-mi takuneqarsinnaavoq Naalakkersuisut ininik tulluurtunik allatigullu najugaqarfissanik pissarsinnaasut. Aalajangersakkat tamakku sanaartornermut, illuutunik aserfallatsaaliuinerit ingerlatsinermullu, ininut allatullu najugaqarfinnut kulturimut sunngiffimmullu atorneqartunut tapiissuteqartarnej pillugu siunnersuummi § 7-imut attuumassuteqarnerat malugeqquneqarpoq.

Naalakkersuisuttaaq nr. 4 naapertorlugu kommuninut suliamik ilisimasalimmik siunnersortimik pissarsinnaapput. Suliatigut ilisimasalimmik siunnersorteqarnermi pineqarsinnaasut tassaasinnaapput allaffissornikkut allatigullu pissutsit kultureqarnermut sunngiffimmilu sammisassaqtitsinermut tunngasut. Assersuutigalugu tassaasinnaapput politikikkut periusissatigullu ilusiligassat, najukkani tapiissuteqarnissamut malitassat aamma sanaartukkanut, illuutunik aserfallatsaaliuinerit ingerlatsinermullu, ininut allatigullu najukkanut tunngassuteqartut.

Naalakkersuisuttaaq nr. 5 naapertorlugu ilinniarnernut, ilinniagaqaqqinnissamut ilinniaqqinnissanullu neqeroorsinnaapput. Tamatumani assersuutitut taaneqarsinnaapput



tapiissutunik aqutsinissamut allaffissornikkut pikkorissarnerit, sunngiffimmi atuartitsinissat il.il. piareersarnissaannut ingerlannissaannullu sulianut pikkorissarnerit.

### *§ 3-mut*

Aalajangersagaq kulturikkut ingerlatsineq sunngiffimilu sammisassaqaartitsineq pillugu peqqussummi § 2, imm. 1-imit ingerlatitseqqinneruvoq. Taamaattoq oqaaseqatigiit kingulliit oqaaseqatigiinnut atuuttunut ersarissaataapput. Taamaaliornikkullu erseqqissarneqarpoq anguniakkanik tunngavigisanillu aalajangersaanikkut kommunini innuttaasut kulturikkut neqeroorutaasunik amerlaqisunik ineriartortitsinissaat, suliaqarnissaat atuinissaallu periarfissinniarneqartoq. Taamatut oqaasertaliinikkut takutinniarneqarpoq pisussaaffiit kommunimi innuttaasunut sanilliullugit namminneq kulturimut neqeroorutaasunik ilaasumik periarfissaqarnissaat, taakkuninngalu atuisinnaanissaat.'

### *§ 4-mut*

#### Imm. 1-imut

Siunnersuummi § 4, imm. 1-imi aalajangersarneqarpoq kommunalbestyrelsi ukiut tamaasa kommunimi kulturikkut ingerlatsinermut sunngiffimilu sammisassaqaartitsinermut pilersaarummik suliaqartassasoq, taannalu kommunip nittartagaatigut tamanut saqqummiunneqartassasoq. Aalajangersagaq kulturikkut ingerlatsineq sunngiffimilu sammisassaqaartitsineq pillugu peqqussummi § 2, imm. 2-mit ingerlatitseqqinneruvoq, taamaattoq tamanut saqqummiussinissamik piumasaqaat nutaajuvoq. Taamaaliornikkut qulakkeerniarneqarpoq innuttaasut oqartussallu allat tamatuminnga ilisimanninnissaat.

#### Imm. 2-mut

Imm. 1-imi pilersaarummut taaneqartumut imarisassat ilusissallu pillugit maleruagassanik aalajangersaanissamik Naalakkersuisut pisinnaatinneqarput.

Kaajallaasitaq nr. 13, 4. september 1981-imeersutigut sunngiffimmi sammisassaqaartitsinissamut kommunip pilersaarutaanik oqaasertaliinissamut maleruagqusanik aalajangersaasoqarnikuvoq. Kaajallaasitaq nr. 15, 20. november 1981-imeersutigut kulturikkut inunnullu qaammarsaasoqarnissaanut kommunip pilersaarutaata oqaasertaliornissaanut maleruagqusanik aalajangersaasoqarnikuvoq. Malittarisassat nutaat kaajallaasitap aalajangersassavaa qaqugu ilisimatitsissummik taarserneqassanersoq.

### *§ 5-imut*

#### Imm. 1-imut

Inatsisartut inatsisaat naapertorlugu kommunalbestyrelsi qanoq ililluni pisussaaffimminik naammassinnissinnaanersoq aalajangersakkatigut aalajangersarneqarpoq. Tamanna Kulturikkut ingerlatsineq sunngiffimilu sammisassaqaartitsineq pillugit peqqussummi § 32

aamma § 33, imm. 1-imik ingerlatitseqqinneruvoq. Ininik ininillu allanik tulluartunik peqartoqarnissaa nutaatut ilanngunneqarpoq. Ininik ininillu allanik pisariaqartinneqartunik peqartoqarnissaanik pisussaaffiliinermi tunngavigineqarpoq kulturikkut ingerlatsinerup sunngiffimmilu sammisassaqaqtitsinerup isumaginissaa kommuninit akisussaaffigineqarmat. Tamanna aamma takuneqarsinnaavoq siunnersuummi § 39, imm. 1-imi aningaasalersuinermut aqutsinermullu tunngasuni.

"Init inillu allat" tamatuma § 7, imm. 1-imi assersuutissamut naapertuuttuunera paaseqquneqarpoq.

Ininut silamilu ingerlatsivinnut meeqqat inuusuttullu suliniaqatigiiffiinit pigineqartunut tunngatillugu Meeqqat inuusuttullu suliniaqatigiivinut init silamilu ingerlatsiviit pillugit Namminersornerullutik Oqartussat nalunaarutaanni nr. 20, 27. september 1988-imeersumi tamanna pillugu maleruaqqusanik aalajangersaasoqarnikuvoq, tassalu meeqqat inuusuttullu suliniaqatigiiffii tassani pineqarlutik.

Nalunaarummi takuneqarsinnaavoq init silamilu ingerlatsiviit tulluartut pisariaqartinneqartunillu atortullit pigineqartussaasut, taakkunungalu ilaasussaasut ineeqqat qaammaqqutillit, kiassakkat, uffarfillit, eqqiaanermut atortullit, pequtillit, atuartitsinermut atortullit pisariaqarneratullu nakkutigineqartut, tamatumunnga ilanngullugu peqaleqarneq.

Nalunaarummitaaq takuneqarsinnaavoq ininut attartortinneqartunut atuinermit inip ingerlanneranut attartornermut akiliuteqartoqassasoq, taakkunungalu ilaallutik aserfallatsaaliuineq, kiassaaneq, qaammaqquteqarneq, eqqiaaneq, imeqarneq, eqqaaveqartitsineq aningaasartuutillu allat.

Aammattaaq aalajangersarneqarpoq kommunimi meeqqat inuusuttullu suliniaqatigiiffiinit meeqqat inuusuttullu sunngiffimmi sammisassaqaqtinnissaannik suliaqartunut, kommunimilu ininik silamilu ingerlatsivinnik piginnittunut imaluunniit attartortunut, kommunalbestyrelsi aningaasartuutaasut 75%-ii angullugit tapiissuteqartoqarsinnaasoq.

Aammattaaq erseqqissaavigineqarpoq tapiissutigineqartut meeqqat inuusuttullu sulineranuinnaq tunniunneqartassasut, nuannanniarnernullu ataatsimoorfiusunut, qitinnernut assigisaannullu tunniussisoqassanngitsoq.

Kiisalu aalajangersarneqarpoq nammineq illorisamut illup nalinginnaasumik aserfallatsaalineqarneranut, kiassarneqarneranut, qaammaqquteqarneranut, eqqiarneqartarneranut, imeqarneranut, eqqaavilerineqarneranut illulu pillugu aningaasartuutitut allanut tapiissuteqartoqartassasoq aamma kommunalbestyrelsip erseqqinnerusumik aalajangersaaneratigut akiitsut erniaannut tapiissuteqartoqartassasoq kisiannili akiitsut akilersorneqarnerannut tapiissuteqartoqarsinnaassanani.

#### Imm. 2-mut

Aalajangersagaq aqutugalugu kommunalbestyrelsip qanoq ililluni inatsisartut inatsisaat malillugu pisussaaffimminik naammassinnissanersaq aalajangersarneqarpoq. Tassani pineqarput illuutiniq atugassaqaqtitsineq sammisallu. Tamanna kulturikkut ingerlatsineq sunngiffimmilu sammisassaqaqtitsineq pillugu peqqussummi § 33, imm. 3-imik ingerlatitseqqinneruvoq. Kulturikkut ingerlatsineq sunngiffimmilu sammisassaqaqtitsineq pillugu peqqussummi nutaajuvoq aamma eqqaaneqarmat kulturikkut ingerlatsinermik sunngiffimmilu sammisassaqaqtitsinermut atugassanik ininik illuutinillu naleqquttunik pissarsiniarnermi kommunalbestyrelsi ikiuussinnaasoq. Aamma nutaajuvoq eqqaaneqarmat kulturikkut ingerlatsinermi sunngiffimmilu sammisassaqaqtitsiniarnermi atorineqartussanik aningaasatigut kommunalbestyrelsi tapiissuteqarsinnaasoq allatigulluunniit pilersitsiniarnermi, atuinermi ingerlatitseqqinnissamilluunniit atungassanik.

#### Imm. 3-mut

Aalajangersakkakut Naalakkersuisut piginnaatitaaffilerneqarput init naleqquttut atorulersuutillu allat pillugit kommunalbestyrelsip pisussaaffii pillugit malittarisassanik aalajangersaasarnissaannut, imm. 1 malillugu. Aalajangersagaq nutaajuvoq.

### *§ 6-imut*

#### Imm. 1-imut

Aalajangersakkami inatsit malillugu kommunit agguarnerisa avataanni susassaqaqfinni kommunalbestyrelsip suliassanik Naalakkersuisut isumaginnittussaananerit pineqarpoq. Matumani Kulturikkut ingerlatsineq sunngiffimmilu sammisassaqaqtitsineq pillugit peqqussummi § 3, imm. 1-imik ingerlatitseqqinneq pineqarpoq.

#### Imm. 2-mut

Naalakkersuisut kommunimi ataatsimi arlalinniluunniit kommunalbestyrelsimik isumaqatigiissuteqarnermikkut, imm. 1 malillugu Naalakkersuisunit pisussaaffigineqartut, suliassat taakku isumagineqarnissaat pillugit kommuninut tunniussisinnaneranerit aalajangersakkami pineqarpoq. Matumani Kulturikkut ingerlatsineq sunngiffimmilu sammisassaqaqtitsineq pillugit peqqussummi § 3, imm. 2-mik ingerlatitseqqinneq pineqarpoq.

### *§ 7-imut*

#### Imm. 1-imut

Aalajangersakkatigut aalajangersarneqarpoq Naalakkersuisut kommunalbestyrelsilu illunik, ininik ininillu allanik kulturikkut ingerlatsinermut sunngiffimmilu sammisassaqaqtitsinermut atorineqartunik sanaartornissamut, aserfallatsaaliuinissamut ingerlatsinissamullu tapiissuteqarsinnaasut, taakkununggalu ilaapput sunngiffimmi ornittakkanut, sunngiffimmi sukisaarsartarfinnut, ininut saqqummersitsisarfinnut, sungiusartarfinnut aamma ataatsimiittarfinnut katersortarfinnullu tapiissuteqarsinnaanerit.

Kulturikkut ingerlatsineq sunngiffimmilu sammisassaqaqtitsineq pillugu peqqussummi § 34, imm. 1 aamma 3-mik ingerlatitseqqinneruvoq. Nutaartaali tassaavoq Naalakkersuisut ingerlatsinermut aamma tapiislinnaammata. Kommunalbestyrelsinit tapiissuteqaarsinnaanermut tunngatillugu periarfissat pisussaaffinnut periarfissanullu ilaasut kommunit Kulturikkut ingerlatsineq sunngiffimmilu sammisassaqaqtitsineq pillugit peqqussummi naapertorlugu ingerlassimasaat pineqarput.

Imm. 2-mut

Aalajangersagaq aqutigalugu tapiissutinik kommunalbestyrelsimiit allanilluunniit tunniunneqaarsimasunik Naalakkersuisut utertitsisinnaanerat periarfissineqarpoq. Aalajangersagaq Kulturimik ingerlatsineq sunngiffimmilu sammisassaqaqtitsineq pillugit peqqussummi § 35-imik ingerlateqqitaavoq, taamaattorli ingerlatsinermut tapiissuteqarneq massakkut aamma ilaalarluni.

#### *§ 8-mut*

Aalajangersakkatigut nutaatut aalajangersarneqarpoq Naalakkersuisut kommunalbestyrelsimik isumasuereerlutik illunik, ininik ininillu allanik kulturikkut ingerlatsinermut sunngiffimmilu sammisassaqaqtitsinermut atorneqaqtunik sanaartornissamut, aserfallatsaaliuinissamut ingerlatsinissamullu tapiissuteqaarsinnaasut, taakkunungalu ilaallutik akisussaanerit suliaassallu agguataarsinnaanerat, tapiissuteqartoqarnissaanut piunnaasaqatit piunnaasineqartullu, qinnuteqarnissamut periaaseq, naatsorsuuserineq kukkunersiunerlu.

Maleruaqqusanik aalajangersaanerup kommunalbestyrelsit isumasioerlugit pisarnissaani tunngavilersuutaavoq kulturimik ingerlatsineq sunngiffimmilu sammisassaqaqtitsineq kommuninit isumagineqartussaammat, taamaammallu kommunit isumaat sapinngisamik ilaatinneqartarnissaat maleruaqqusanik aalajangersaasoqarnerani pingaaruteqartut isigineqarmat.

#### *§ 9-imut*

Ingerlatanut tapiissuteqaarsinnaaneq aalajangersakkami pineqarpoq. Aalajangersakkap Kulturikkut ingerlatsineq sunngiffimmilu sammisassaqaqtitsineq pillugit peqqussummi § 30-p malunnartumik annertusineqarnera pineqarpoq.

Nutaatut imm. 2-mi Naalakkersuisut Kalaallit Nunaata avataani kulturikkut ingerlatsinermut sunngiffimmilu sammisassaqaqtitsinermut tapiissuteqaarsinnaanerat tunngavissillugu aalajangersarneqarpoq. Imm. 3-mi nutaatut ikkunneqarpoq Naalakkersuisut kommunalbestyrelsillu tapiissutinik tunniussinerminni sammisassat meeqqanik inuusuttunillu, inunnik timimikkut ajoquteqartunik aamma inuuniarnikkut ajornartorsiuteqartunik ilaatitsisut

sapinngisamik salliutissagaat. Imm. 4-mi sammineqarpoq Naalakkersuisut imm. 1 naapertorlugu tapiissutinik tunniussinerminni sammisassat nuna tamakkerlugu imaluunniit kommunini marlunni arlalinniluunniit ingerlanneqartussat sapinngisamik salliutissagaat, taannalu Kulturikkut ingerlatsineq sunngiffimmilu sammisassaqaartitsineq pillugu peqqussummi § 30, imm. 2-mit ingerlatitseqqinneruvoq, minnerusumilli allannguilaarluni. Imm. 5-imi aamma taamaappoq, tassa naalakkersuinikkut, upperisarsiornikkut sulisartoqarnermilluunniit peqatigiiffeqarnikkut siunertarineqartunut tapiissuteqarsinnaannginnerat. Kulturikkut ingerlatsineq sunngiffimmilu sammisassaqaartitsineq pillugu peqqussummi § 40, imm. 4-mit ingerlatitseqqinneruvoq. Imm. 6-imi nutaatut ikkunneqarpoq Naalakkersuisut kommunalbestyrelsinik isumasioqateqareerlutik kulturikkut ingerlatsinerup sunngiffimmilu sammisassaqaartitsinerup iluini sammisassanut, tassunga ilanngullugit akisussaaffinnik suliassanilla agguassinissamut, ingerlatsinerup tapiiffigineqarsinnaasup killilerneqarnissaanut, piumasaqaatinut tapiissuteqarnissamullu piumasaqaatinut, qinnuteqarnissamut, naatsorsuuserinermut kukknersuinernullu tapiissuteqarnissamut malittarisassaliorsinnaasut.

#### Imm. 1-imut

Aalajangersagaq nutaajuvoq, sammisanullu sorlernut tapiissuteqarsinnaaneq aalajangersaaffigineqarluni. Tamanna ulloq manna periuserineqartumik nangitsineruvoq.

#### Imm. 2-mut

Aalajangersagaq nutaajuvoq, Naalakkersuisullu kulturikkut ingerlatsineranut sunngiffimmilu sammisassaqaartitsineranut Nunatta avataani ingerlanneqartunut tapiissuteqarsinnaanerat tunngavissinneqarpoq. Tamanna periuserineqartunik katersuineruvoq.

#### Imm. 3-mut

Aalajangersagaq nutaajuvoq, tassanilu aalajangersarneqarpoq Naalakkersuisut kommunalbestyrelsilu tapiissuteqarnerminni sapinngisamik sammisassat meeqqanik inuusuttunilla, inunnik timimikkut ajoquteqartunik aamma inuuniarnikkut ajornartorsiuteqartunik ilaatitsisut salliutinneqassasut. Sullitassat taakkua tapiiffigineqarnerisigut pingaartinneqarnissaasa qulakkeerneqarnissaa aalajangersakkami siunertarineqarpoq.

Meeqqanut inuusuttunullu tunngatillugu taakkununga sammisassaqaartitsinerup pingaartinneqarnerani meeqqat kulturikkut ingerlatanut sunngiffimmilu sammisassanut peqataanissaasa iluaquteqarnissaasalu pingaaruteqassusiat tunngavilersuutaavoq, tassa tamanna aqqutigalugu inuunikkut atugarisaat, ineriartornerat ilikkarsinnaanerallu nukittorsarneqassammata.

Inunnut timimikkut ajoquteqartunut tunngatillugu taakkua pingaartinneqarnerannut tunngavilersuutaavoq taakkununga ileqqusumik kulturikkut ingerlatsinerit sunngiffimmilu

sammisassaqtitsinerit tikikkuminaassinnaasarnerat, tamannalu pissutigalugu taakkununga anguniagaqarfiusumik neqeroortalernissap qulakkeerniarnissaa qitiutittariaqarluni.

Inuuniarnikkut ajornartorsiuteqartunut tunngatillugu taakkununga sammisassatigut pingaartitsinermit tunngavilersuutaavoq inuit inuuniarnermikkut ajornartorsiutillit sunniuteqarsinnaangitsutut inissineqakkajuttarmata, taamaalillutillu ileqqusumik kulturikkut ingerlatsinermit sunngiffimmilu sammisassaqtitsinermit neqeroorutaasuni peqataaangikkaangamik atuineq ajorlutik. Sullitanut taakkununga tunngatillugu sammisassanik pingaartitsineq peqataarusulernermit, ataatsimooqataalernermit ataqatigiilernermillu misiginermik kinguneqartussaavoq.

Imm. 4-mut

Aalajangersakkatigut Naalackersuisut sapinngisartik malillugu sammisassat nuna tamakkerlugu ingerlanneqartut imaluunniit sammisassat kommunini marlunni amerlaneruiluunniit ilaatinneqartut salliutittassagaat. Aalajangersagaq Kulturikkut ingerlatsineq sunngiffimmilu sammisassaqtitsineq pillugit peqqussummi § 30, imm. 2-mik ingerlatitseqqinneruvoq, allannguuteqalaarlunili, tassami massakut sammisassat kommunini marlunni amerlaneruiluunniit ingerlanneqartut ilanngunneqarmata.

Imm. 5-imut

Aalajangersakkatigut aalajangersarneqarpoq tapiissutit naalackersuinikkut, upperisarsiornikkut sulisartoqarnermilluunniit peqatigiiffilerinikkut siunertarineqartunut tapiissuteqartoqarneq ajortoq. Tamanna Kulturikkut ingerlatsineq sunngiffimmilu sammisassaqtitsineq pillugit peqqussummi § 30, imm. 4-mik ingerlatitseqqinneruvoq.

Aalajangersakkatigut sulinernut peqatigiiffinniit taamaattunit ingerlanneqartunut tapiissuteqarsinnaaneq mattunneqanngilaq, matumani sammisaq taamaattunik imaqartinneqanngippat. Taamatuttaaq peqatigiiffinnut taamaattunut ininik assigisaannillu attartortitsinikkut tapiissuteqartoqarsinnaavoq, peqatigiiffilerinernut allanut piumasarineqartartut assigalugit.

Imm. 6-imut

Aalajangersagaq nutaajuvoq, Naalackersuisullu kommunalbestyrelsinik isumasiuereerlutik kulturikkut ingerlatsinermit sunngiffimmilu sammisassaqtitsinermit sammisanut tapiissuteqarnissaq pillugu maleruaqqusanik aalajangersaasinnaanernut immikkut ittumik tunngavissinneqarput.

Maleruaqqusanik aalajangersaanerup kommunalbestyrelsit isumasioereerlugit pisarnissaani tunngavilersuutaavoq kulturimik ingerlatsineq sunngiffimmilu sammisassaqtitsineq kommuninit isumagineqartussaammat, taamaammallu kommunit isumaat sapinngisamik ilaatinneqartarnissaat maleruaqqusanik aalajangersaasoqarnerani pingaaruteqartutut isigineqarmat.

## § 10-imut

### Imm. 1-imut

Sunngiffimmi atuartitsinerup nassuiarnerani atuartitsinerup ilinniarnissamut inuussutissarsiulernissamullu piginnaanngorsarfiunngitsumik atuartitsissutaanera erseqqissaaffigineqarpoq. Inatsisip nutarternerani siunertat ilagaat piginnaaneqalissutaasumik atuartitsineq sunngiffimmi atuartitsinerup ilaatinneqassanngitsoq, taamaattoq ilinniartitaaneq pillugu inatsimmit aalajangersarneqassasoq. Taamatut oqaasertaliineq isumaqarpoq atuartitsineq piginnaasaqalersitsissutaasinnaalluarmattaq.

### Imm. 2-mut

Aalajangersakkatigut aalajangersarneqarpoq qanoq isilluni sunngiffimmi atuartitsinerup piareersarneqarsinnaanera. Kulturikkut ingerlatsineq sunngiffimmilu sammisassaqaartitsineq pillugu peqqussummi § 4-mik ingerlatsineruvoq. Tassunga nassuiaasiornermi sukaterisoqarpoq, tassami inersimasunut højskolertitsisarneq, faginik ataasiakkaanik atuartitsineq, immikkut atuartitsineq inuussutissarsiutinillu pikkorissartarnerit peerneqarmata. Tassani peqqutaavoq taakku inatsimmi allammi aalajangersarneqarmata.

### Imm. 3-mut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 4, imm. 2-mik ingerlatitseqqinneruvoq.

Ukioqatigiinngitsut ataatsimoorussinnaanerinut periarfissaqaarnikkut siunertarineqarpoq aaqqissuussinerup sapinngisamik ammasuunissaa, Aappaatigulli sammineqartup sunaanera apeqqutaatillugu aalajangersimasunik ukioqatigiiaanun sunngiffimmi atuartitsinissamut periarfissaqassaaq taamatuttaaq meeraannanut inersimasuinnarnulluunniit.

### Imm. 4-mut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 4, imm. 4-mik ingerlatitseqqinneruvoq.

Ataatsimoorussamik aaqqissuussinernut assersuutitut tammaarsimaaqatigiinnerit, oqalugiarnert nuannersumillu ataatsimooqatigiinnerit immikkut taaneqarsinnaapput.

### Imm. 5-imut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 4, imm. 5-imik ingerlatitseqqinneruvoq.

Sunngiffimmi atuartitsineq piffissami aalajangersimasumi ingerlanneqartussatut aalajangigaanngilaq, soorlu nalinginnaasumik suliffiup avataani, sapaatip akunnerata naanerani il.il.

Imm. 6-imut

Aalajangersagaq kulturikkut ingerlatsineq sunngiffimmilu sammisassaqtitsineq pillugit peqqussummi § 4, imm. 1 oqaaseqatigiinnik kingullernik ingerlatitseqqinneruvoq.

Tamanna Inersimasunut sunngiffimmi atuartitsinermi sammisassat suuneri pillugit Kaajallaasitaq nr. 23, 26. juni 1980-imeersumi aalajangersakkatigut aalajangersarneqarpoq. Kaajallaasitami ilinniartitsissutit sorliit akuerineqannginersut aalajangersarneqarpoq. Malittarisassat nutaat kaajallaasitap aalajangersassavaa qaqugu ilisimatitsissummik taarserneqassanersoq.

### *§ 11-imut*

Imm. 1-imut

Aalajangersagaq kulturikkut ingerlatsineq sunngiffimmilu sammisassaqtitsineq pillugit peqqussummi § 5, imm. 1 aamma 2-mik ingerlatitseqqinneruvoq. Tassungali tunngatillugu sunngiffimmi atuartussatut pilersinneqartussanut piumasaqaatit pillugit aalajangersakkami aallarniutaasumi pissutsit ataatsimut pissusillit katersorneratigut pisariinnerusumik aaqqiiviginiarneqarput.

Nr. 3, 5 aamma 8 tunngatillugit Kulturikkut ingerlatsineq sunngiffimmilu sammisassaqtitsineq pillugit peqqussummi § 5, imm. 2, nr. 3, 4 aamma 7-imik ingerlatitseqqinneq matumani pineqarpoq.

Nr. 1-imut tunngatillugu aalajangersakkanut amerlanerusunut innersuussinissamut taarsiullugu imm. 3-mut, peqataasut qanoq ukioqarnissaannik aalajangersaasinnaanermut innersuussisoqarpoq.

Nr. 2-mut tunngatillugu aqutsisup piginnaasaanut piumasaqaatit pisariaqanngitsutut isigineqarmata peerneqarsimapput.

”Atuartitsinissamut pisariaqartinneqartunik pisinnaasaqassaaq”-mik oqarneq imatut paasineqassaaq atuartitsisoq ilinniarnermik tunuliaqutaqartoq assersuutigalugu ilinniartitsisutut, imaluunniit atuartitsisoq allatut, matumani siusinnerusukkat atuartitsinermik ima misilittagaqartoq, taamatut piginnaasaqalersimasoq atuartitsinermik ingerlatsisinnaalersimalluni.

Nr. 4-mut tunngatillugu imatut paasillugu nutaajuvoq, tassalu piumasaqaat taanna manna tikillugu atuartitsissutit ataasiakkaat pillugit aalajangersakkanut ilanngullugit suliarineqartarsimasut.



”Atuartitsinissaq”-mik oqarnermi perorsaanikkut ingerlatatigut atuartitap atuartitsissutigineqartutigit ilikkagaqartinneqarnissaa pineqartoq.

Nr. 6-imut tunngatillugu meeqqat inuusuttullu ineqannginnerat 20-niit 18-inut ukiulinnut apparneqarpoq.

Nr. 7-imut tunngatillugu nutaatut allaaserineqarpoq peqataanissamut nalunaarsimasut ikinnerpaamik arfineq pingasuussasut, taamaattorli imm. 2-mi immikkut akuersissuteqarnissamut aalajangersakkamut § 16, imm. 2-milu aamma § 17, imm. 2-mi atuartitsissutinut immikkut ittunut piumasaqaatit allat pillugit aalajangersakkanut innersuussutigineqarput. Peqataasut minnerpaamik arfineq pingasuunissaat pillugu piumasaqaat manna tikillugu malittarisassaq pingaarneruvoq.

Nr. 9-mut tunngatillugu, taanna nutaajuvoq atuartitsissutinut ataasiakkaanut immikkut ittumik piumasaqaatinut tunngatillugu aalajangersakkatut qitiusussatut eqqarsaatigineqarsimasoq. Imaassinnaavoq atuartitsissutini ulluinnarni atortariaqakkanik sammisaqartitsinermut aamma nutaaliornermut sammisaqartitsinermut peqataasut attallaanik atisanilluunniit allanik sammisamut tulluurtunik nassataqartariaqarsinnaasut.

Imm. 2-mut

Peqataasut qanoq amerlatiginissaannut piumasaqaammit saneqqutsinissamut immikkut akuersissut pillugu aalajangersagaq Kulturikkut ingerlatsineq sunngiffimmilu sammisassaqaartitsineq pillugit peqqussummi § 5, imm. 3-mik ingerlatitseqqinneruvoq.

Imm. 3-mut

Imm. 1-imut nassuiaatit innersuussutigineqarput.

### *§ 12-imut*

Aalajangersagaq nutaajuvoq aalajangersarlugillu qaqugukkut atuartitsinermi holdi atorunnaarsinneqarsinnaanersoq.

Aalajangersagaq pingaarnertut malittarisassaavoq § 16, imm. 3-mut oqalugiartitsisarnerit atorunnaarsinneqarnerat pillugu immikkut malittasisassaasumut innersuussinikkut saneqqunneqartussaq.

Sunngiffimmi atuaqatigiittoqartarnissaanik atorunnaarsitsineq pillugu aalajangersakkat Kulturikkut ingerlatsineq sunngiffimmilu sammisassaqaartitsineq pillugit Inatsisartut peqqussutaanni atuartitsisarnerit ataasiakkaat pillugit aalajangersakkani ataasiakkaani tamani aalajangersarneqarsimapput. Malittarisassat atuuttut paarlattuanik, peqataasut amerlassusissaannit taaneqartunit ikinnerulerpata kommunip holdit atorunnaarsinnissaat

pisussaaffigiunnaassavai, siunertamulli naapertuuttut isumaqarfigippagu holdimik atorunnaarsitsisinnaavoq. Aalajangersagaq imamigut allanngunngilaq.

Ilinniartitsineq taamaatiinnarneqarpat, peqataasut agguaqatigiissillugu amerlassusiisa naatsorsorneqarnerinut taanna ilaatinneqassanngilaq.

#### *§ 13-imut*

Aalajangersagaq kulturikkut ingerlatsineq sunngiffimmilu sammisassaqaqtitsineq pillugit peqqussummi § 6, imm. 1-imik ingerlatitseqqinneruvoq.

#### *§ 14-imut*

Aalajangersagaq kulturikkut ingerlatsineq sunngiffimmilu sammisassaqaqtitsineq pillugit peqqussummi § 7, imm. 1-imik ingerlatitseqqinneruvoq.

#### *§ 15-imut*

Aalajangersagaq kulturikkut ingerlatsineq sunngiffimmilu sammisassaqaqtitsineq pillugit peqqussummi § 9, imm. 1-imik aamma 3-mik ingerlatitseqqinneruvoq.

#### *§ 16-imut*

Aalajangersagaq kulturikkut ingerlatsineq sunngiffimmilu sammisassaqaqtitsineq pillugit peqqussummi § 10, imm. 1, 3 aamma 4-mik ingerlatitseqqinneruvoq.

#### *§ 17-imut*

Aalajangersagaq kulturikkut ingerlatsineq sunngiffimmilu sammisassaqaqtitsineq pillugit peqqussummi § 14, imm. 1, 3, 4 aamma 5-imik ingerlatitseqqinneruvoq.

#### *§ 18-imut*

Aalajangersagaq kulturikkut ingerlatsineq sunngiffimmilu sammisassaqaqtitsineq pillugit peqqussummi § 15-imik ingerlatitseqqinneruvoq.

#### *§ 19-imut*

Aalajangersagaq kulturikkut ingerlatsineq sunngiffimmilu sammisassaqaqtitsineq pillugit peqqussummi § 16-imik ingerlatitseqqinneruvoq. Tassungali tunngatillugu akiliisitsisarneq maannamut pisussaaffiusimasoq periarfissanngortillugu allanngortinneqarnera matumani pineqarpoq. Aammattaaq imm. 2 malittarisassanik aalajangersaanissamut pisussaaffittut

inatsimmi tunngavittut aalajangersagaasimasoq periarfissanngortinneqarpoq pissaaffiujunnaarsillugu.

Sunngiffimmi ilinniartitsinermi peqataanermut akiliuteqartitsisarneq pillugu Namminersornerullutik Oqartussat nalunaarutaat nr. 29, 27. juni 1994-imeersukkut suliassaqarfimmut malittarisassanik aalajangersaasoqarsimavoq.

#### § 20-mut

##### Imm. 1-imut

Aalajangersagaq nutaajuvoq aalajangersarlugulu, sunngiffimmi ornittagaq qanoq paasineqassanersoq. Suleriaatsit aallaavigalugit nassuiarneqarpoq.

Sulisut ilinniarsimasuunissaannut piumasaqaammut taaneqarneranullu ilaatillugu perorsaanikkut siunnerfeqartumik sulineq pineqartillugu erseqqissaatigineqassaaq paaqqinninneq kisimi pineqanngimmat neqeroorutikkulli meeqqat inuusuttullu atugaannik, peqqissusissaannik, ineriartornerannik ilinniarnernannillu siuarsaavigineqassasut.

Sulisut perorsaanermik ilinniarsimasut pineqartut tassaapput inuit perorsaanermik tunngaviusumik imaluunniit ingerlaqqiffiusumik ilinniarsimasut. Tunngaviusumik ilinniarnernit ilaatigut tassaasinnaapput meeqqerinnermi ikiortit, isumaginninnermi ikiortit, isumaginninnermi peqqissaanermilu ikiortit aamma isumaginninnermi ikiortit. Inuit ingerlaqqiffiusumik ilinniarsimasut tassaapput perorsaaq, isumaginninnermi perorsaaq, isumassuinnermi perorsaaq aamma meeqqerivinni perorsaaq. Ilinniakkat taaneqartut ullumikkut tamarmiunatik neqeroorutigineqartarnerat apeqqutaatinnagu taakku taaneqarnissaat eqqortutut isigineqarpoq, tassami taakku sulisinnaasut akornaneereermata.

Perorsaanikkut siunnerfeqartumik sulineq imatut paasineqassaaq, meeqqap inersimasullu peqataanera tunngavigalugu meeraq inuusuttorluunniit pinnguarnikkut allatigullu ingerlatatigut ilinniassasoq ineriartussasorlu. Tassunga ilanngunneqassaaq sammisat meeqqap inuusuttulluunniit ineriartornissaanut pilersaarutinut siunertanullu tunngatillugu ilusilersorneqassasut.

##### Imm. 2-mut

Aalajangersagaq nutaajuvoq sunngiffimmilu ornittagaq atuarfimmik angajoqqaanillu suleqateqarnissamik pisussaaffiliisoq, atuarfimmi atuartitsinermit sunngiffimmi ornittakkamut ikaarsaariarnerup ataqatigiinnera peqataaffigissallugu. Tamatumani siunertarineqarpoq meeqqap inuusuttulluunniit sunngiffimmi ornittakkamiinnerani atuarfimmiinneratulli meeqqap inuusuttulluunniit ineriartornissaanut atugassarititaasut pitsaanerpaat pilersissallugit.

#### § 21-imut

##### Imm. 1

Aalajangersagaq nutaajuvoq aalajangersarlugulu sunngiffimmi ornittagaq kommunip paaqqinnittarfiutaatut ingerlanneqarsinnaasoq. Paaqqinnittarfiit taamaattut sunngiffimmi ornittagaq kommunip ingerlataatut taaneqartarput.

Kommunit paaqqinnittarfiutai aamma ulluunerani paaqqinnittarfinnut suliassaqarfimmi ilisimaneqarput.

Imm. 2.

Aalajangersagaq nutaajuvoq aalajangersarlugulu kommunalbestyrelse isumaqatigiissuteqarfigineratigut sunngiffimmi ornittagaq aamma paaqqinnittarfittut imminut pigisutut ingerlanneqarsinnaasoq, sunngiffimmi ornittakkatut imminut pigisutut imaluunniit paaqqinnittarfittut namminersortutut taaneqartoq, sunngiffimmi ornittakkatut namminersortutut taaneqartoq kommunalbestyrelsip ingerlatsineq pillugu isumaqatigiissuteqarfigisinnaasaa. Tamanna periuserineqartunik katersuineruvoq. Paaqqinnittarfiit imminnut pigisut aamma ulluunerani paaqqinnittarfinnut suliassaqarfimmi ilisimaneqarput.

Sunngiffimmi ornittagaq imminut pigisut sunngiffimmilu ornittakkat namminersortut, pilersuisutut namminersortutut kommunalbestyrelsillu akornanni sunngiffimmi ornittakkatut imminut pigisutut imaluunniit sunngiffimmi ornittakkatut namminersortutut pilersitsisinnaaneq pillugu isumaqatigiissummik tunngaveqarpoq. Kommunilbestyrelsi kikkunnik isumaqatigiissuteqarsinnaanerannik piumasaaqateqartoqanngilaq. Kommunilbestyrelsip pilersitsinissaq pillugu isumaqatigiissuteqarusunnerluni aalajangissavaa, kommunalbestyrelsilu siusinnerusukkut sunngiffimmi ornittakkamik imminut pigisumik imaluunniit sunngiffimmi ornittakkamik namminersortumik allamik isumaqatigiissuteqarnikuunini pissutigalugu isumaqatigiissuteqarnissamut pisussaaffeqanngilaq.

## § 22-mut

Imm. 1-imut

Aalajangersagaq nutaajuvoq sunngiffimmilu ornittakkap illutaanut piumasaaqatinut tunngalluni. Ulluunerani paaqqinnittarfinnut tunngatillugu Meeqqanut suli atualinngitsunut inatsimmi § 10, imm. 1-imi aamma § 12, imm. 1-imi aalajangersakkat taamaaqatigai.

Saniatigut oqaatigineqassaaq, Sanaartorneq pillugu Inatsisartut inatsisaat nr. 13, 26. maj 2010-meersumi nalinginnaasumik piumasaaqateqareermat, sanaartukkat sananeqarlutillu ilusilerneqassasut isumannaallisaaneq, peqqinnissaq, tamanit atorneqarsinnaallutillu tikikkuminartuunissaat, kiisalu eqqiarneqarnissaat aserfallatsaalinissaallu eqqarsaatigalugit naammaginantumik toqqissisimanartunngorlugit.

Illuutit, matumani sunngiffimmi ornittakkat ilanngullugit sanaartorneq pillugu inatsimmi pineqartunut ilaapput. Ilangunneqassaaq kommunalbestyrelsi sanaartorneq pillugu inatsisit malillugit sanaartornermut oqartussaasuummat, taamatullu kommunalbestyrelsi Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaat nr. 14, 26. maj 2010-meersoq naapertorlugu qatserisartoqarnermut oqartussaasuulluni. Taamaalilluni sanaartornermut qatserisartoqarnermullu oqartussaasut nakkutilliisutut suliasat inatsisit allat aqqutigalugit malittarisassiorneqareerput.

Sunngiffimmi ornittakkap atoqqaarnersiorneranut atatillugu akuersissuteqarneq pissaaq, soorlu aamma tamatuma kingornatigut sunngiffimmi ornittakkamik allanngortitsinerit kommunalbestyrelsi akuersissasoq.

Imm. 2-mut

Aalajangersagaq nutaajuvoq. Ulluunerani paaqqinnittarfiit pillugit Meeqqat suli atualingitsunut inatsimmi § 12, imm. 2-mi aalajangersakkat taamaaqatai nassaassaapput.

Aalajangersakkami oqariartuutaavoq, akuersereernerup kingornatigut ingerlaavartumik nakkutigineqassasoq, akuersinermit tunngaviusut suli atuunnersut. Ulluinnarni nakkutilliineq kommunimi ingerlatsivimmit akisussaasumit ingerlanneqassaaq. Taamaalilluni nakkutigineqassaaq sunngiffimmi ornittakkat ataasiakkaat aserfallatsaaliorneqarnerat, matumani sunngiffimmi ornittakkap illutaata sanaartornermi aamma atuilernermi akuersissummi qaqugukkulluunniit atugassarititatut aalajangersakkat eqqortinneqarnermut ilanngullugit eqqarsaatigalugit.

Imm. 3-mut

Aalajangersagaq nutaajuvoq. Ulluunerani paaqqinnittarfiit pillugit Meeqqat suli atualingitsunut inatsimmi § 12, imm. 3-mi aalajangersakkat taamaaqatai nassaassaapput.

Perorsaanikkut piunasaqaatit tunngaviillu aallaavigalugit illup iluanut silataanullu piunasaqaatinik malittarisassiornissamut pisinnaatitsinermit aalajangersagaq atorneqarsinnaavoq. Tassunga atatillugu annertussutsinut pisatsersuinissamullu piunasaqaateqartoqarsinnaavoq, assersuutigalugu ininut katersuuttarfinnut, qasuersartarfinnut, immikkut suliaqarfinnut, igaffinnut, perusersartarfinnut uffartarfinnut, errorsivinnut, sulisut atisaajartarfiinut il.il.

Aalajangersagaq aammattaaq innarluutilinnut atortorissaarutininik pilersitsinermit pisatsersuinerimullu malittarisassiornermut atorneqarsinnaavoq.

Aalajangersagaq taamaalilluni sanaartorneq pillugu inatsimmi pineqartunut tunngassuteqanngilaq, soorlu pissutsit isumannaallisaanermut peqqinnissamullu tunngasut pillugit piunasaqaatinik minnerpaaffiusunik kiisalu tikikkuminartuunermut illuliornermi

malittarisassani aalajangersagaqareersoq. Aalajangersakkap “-sinnaavoq”-mik oqaasertaqarnera isumannaallisaanermut, peqqinnissamut, tikinneqariaannaaneranut aamma tamanit atorneqarneranut kiisalu eqqiluisaarnermut aserfallatsaaliuinemullu tunngaviusumik piumasagaatinik malittarisassaqaqareerneranut sanilliunneqassaaq.

#### § 23-mut

Imm. 1-imut

Aalajangersagaq nutaajuvoq. Ulluunerani paaqqinnittarfiit pillugit Meeqqat suli atualingitsunut inatsimmi § 13, imm. 1-imi aalajangersakkat taamaaqatai nassaassaapput.

Aalajangersagaq inunnut sunngiffimmi ornittakkanik soqutigisalinnut iluaqutaasumik ammasumik ersarissumillu ingerlatsinissamik kissaateqarnermik aallaaveqarpoq, assersuutigalugu sunngiffimmi ornittakkamik atuisuusut, tassalu angajoqqaat, pilersuisuusut, oqartussat sulisut allallu pineqarlutik.

Aalajangersakkamit ersippoq akuerisaanermut uppersaataat sunngiffimmi ornittakkani takuneqarsinnaassasoq, taamaalilluni assersuutigalugu angajoqqaatut oqartussaasut imaluunniit pilersuisuusut akuerisaanermut uppersaataammi paasissutissiissutigineqartunik ilisimasaqarsinnaaqqullugit.

Imm. 2-mut

Aalajangersagaq nutaajuvoq. Ulluunerani paaqqinnittarfiit pillugit Meeqqat suli atualingitsunut inatsimmi § 13, imm. 2-mi aalajangersakkat taamaaqatai nassaassaapput.

Aalajangersakkami ersippoq akuerisaanermut uppersaataat paasissutissanik sunik imaqaassanersoq. Aalajangersakkami nr. 8-mut tunngatillugu oqaatigineqarsinnaavoq oqaaseq ”oqartussanit susassaqartunit” atorneqarmat, taamaalilluni oqartussat piumasagaatigisinnaasaannut nutaanut aalajangersakkamik allanngortitsinissamik pisariaqartitsisoqassanngilaq.

Nr. 2-mi meeqqat inuusuttullu pillugit isumaani pineqarsinnaapput sunngiffimmi ornittakkap meeqqat inuusuttullu qanoq naapittarnerai, inersimasut meeqqanut inuusuttunullu akisussaaffii suunersut, aamma meeqqat inuusuttullu qanoq ineriartornersut.

#### § 24-mut

Aalajangersagaq nutaajuvoq suleriaatsimillu aqqissuussinermut ersisitsilluni.

Imm. 1-imut

Aningaasartuutit tamakkiisumik ilaannakuusumilluunniit Namminersorlutik Oqartussanit allaniilluunniit akilerneqartussaasut pillugit erseqqissumik inatsisitigut tunngavissaqanngippat § 39 tunngavigalugu kulturikkut ingerlatsinermut sunngiffimmilu sammisassaqartitsinermut

anigaasartuutit tamarmik kommunimit akilerneqassapput. Tamanna sunngiffimmi ornittakkamik atuinerup akeqartinneqarnissaanut aporfissaliinngilaq.

Imm. 3-mut innersuussineq ersiutaasoq tassaavoq, ilaannakortumik atuisunut akiliuteqartitsineq taamaallaat pineqartoq.

Imm. 4-mut innersuussinermut ersiutaavoq, sunngiffimmi ornittakkamik atuisunut akiliuteqartitsineq pillugu nalunaarutikkoortumik malittarisassiortoqarsinnaasoq, matumani isertitaqqortussuseq naapertorlugu akiliuteqartitsisarneq pillugit aqutsineq ilanngullugu.

Imm. 2-mut

Kommunimi nalinginnaasumik sunngiffimmi ornittakkanut ingerlatsinermut anigaasartuutit ilanngaaserneqanngitsunut agguaqatigiissillugit missingersuutit pineqarput.

Imm. 3-mut

Aalajangersagaq nutaajuvoq, suleriaatsimulli aaqqissuussinerulluni.

”Sunngiffimmi ornittagaq atorneqartoq qanorluunniit isikkoqaraluarpat”-mik oqarnermi pineqarput sunngiffimmi ornittagaq kommunimit ingerlanneqartoq, sunngiffimmi ornittagaq imminnut pigisoq imaluunniit sunngiffimmi ornittagaq namminersortoq.

Imm. 4-mut

Aalajangersagaq nutaajuvoq.

Meeqqanut suli atualinngitsunut perorsaanikkut inerikkiartuutaasumik ulluunerani neqeroorutinut akiliuteqartarneq pillugu Namminersorlutik Oqartussat nalunaarutaanni nr. 3-mi, 4. februar 2011-meersumi meeqqanut suli atualinngitsunut perorsaanikkut inerikkiartuutaasumik kommunit ulluunerani neqeroorutinut akiliuteqartitsineq pillugu malittarisassanik aalajangersagaqarpoq.

Nalunaarut aamma sunngiffimmi ornittakkamiittarnermut akigititanik aalajangersaasinnaaneq pillugu aalajangersakkamik imaqarpoq. Taamaalilluni § 2, imm. 2-mi aalajangersarneqarsimavoq: "sunngiffimmi ingerlataqarnermik aaqqissuussineq pillugu Inatsisartut inatsisaata akuerineqarnissaata tungaanut sunngiffimmi ornittakkaniinnermut akinik immikkut aalajangersaasoqarsinnaasoq, takuuk Meeqqanut suli atualinngitsunut perorsaanikkut inerikkiartuutaasunik ulluunerani neqerooruteqartarneq pillugu Inatsisartut peqqussutaanni nr. 10-mi, 5. december 2008-meersumi § 31, imm. 3 .

#### § 25-mut

Aalajangersagaq nutaajuvoq. Inatsimmi ulluunerani neqeroorutit pineqartut Meeqqat suli atualinngitsunut inatsimmi § 29, imm. 2-mi taamaaqataanik aalajangersagaqarpoq.

Akiliuteqartussaataasup imaluunniit akiliuteqartussaataasut aningaasatigut inissisimanerisa pingaartinneqarnissaa taamaalilluni aalajangersaanikkut ersarissarneqarpoq, tassalu pingaartitsinermi angajoqqaat aningaasatigut inissisimanerat pineqartariaqanngitsoq. Taamaalilluni kiap akiliuteqartussaataasutut isigineqarnera pingaarneruvoq, tamannalu kiap meeqqamik timikkut pilersuinissamik isumaginnittuinnera malillugu nalilernerqassaaq. Pisuni amerlanerpaani tassaasarpuk angajoqqaat, meeqqat angajoqqaani nalinginnaasumik najugaqartarmata, taamaalillutillu angajoqqaanit pilersorneqarlutik. Meeqqat angajoqqaarinngisani aalajangersimasumik najugaqarpata, taamaalillunilu pilersuineq allanit isumagineqarluni pilersuisuunermik tunngavik aallaavigalugu taakku meeqqamik pilersuisutut isigineqassapput. Meeraq angajoqqaat arlaanni aalajangersimasumik najugaqarpat, angajoqqaq taanna pilersuisutut isigineqassaaq.

#### § 26-mut

Aalajangersagaq nutaajuvoq suleriaatsimillu aqqissuussinermut ersisitsilluni.

##### Imm. 1-imut

Ilanngunnissaq pillugu aalajangiineq pissaaq tunaartarisassat iluanni, taakku kommunalbestyrelsen siunnersuummi § 27, imm. 1 tunngavigalugu aalajangersassavai tamanullu saqqummiullugit.

##### Imm. 2-mut

Sunngiffimmi ornittagaq imminut pigisoq sunngiffimmi ornittakkamut ilanngunnissaq pillugu aalajangiisinnaanngortinneqarsimappat, tamanna pissaaq tunaartarisassat iluanni taakkulu sunngiffimmi ornittakkap siunnersuummi § 27, imm. 2 tunngavigalugu aalajangersassavai tamanullu saqqummiullugit.

##### Imm. 3-mut

Sunngiffimmi ornittakkani namminersortuni kina ilanngunnissamut aalajangiissanersoq, ornittakkami piginnaatitsissutitut malittarisassat naaportorlugit aalajangiivigineqassaaq. § 27, imm. 4 innersuullugu ilanngunnissamut aalajangiisinnaasut pillugit ersarissarneqarpoq meeqqat ornittagaat namminersortut meeqqanut sunngiffimmi ornittakkanut inissaqartinneqanngitsunik itigartitsisinnaanngitsut.

#### § 27-mut

Aalajangersagaq nutaajuvoq suleriaatsimilli aqqissuussinermik ersersitsilluni.

##### Imm. 1-imut

Neqeroorummuk qinnuteqaatit sulisut nammassinnaasaat sinnerlugit amerlaneruppata, tunaartarisassanik aalajangersaaneq pissaaq ilanngunneqarnissamut pingaarnersiuinermullu piumasagaatit ersarinnerulernissaat siunertaralugu.



Angajoqqaat meeqqamik sunngiffimmi ornittakkami aalajangersimasumut ilanngunneqarnissaanut kissaateqarnerat inatsisitigut pisussaaffiliinngilaq.

Imm. 2-mut

Imm. 1-imut nassuiaatit innersuussutigineqarput.

Imm. 3-mut

§ 1-imut nassuiaatit innersuussutigineqarput.

Imm. 4-mut

Aalajangersakkakut qulakkearniarneqarpoq pisinnaasat atorluarneqarnissaat suliamullu attuumassuteqanngitsumik tunngaveqarluni itigartitsisoqartannginnissaa.

#### § 28-mut

Aalajangersagaq nutaajuvoq suleriaatsimilli aqqissuussinermik ersersitsilluni. Atualertussat pillugit inatsimmi § 14-imi ulluunerani paaqqinnittarfiit pillugit taamaattumik aalajangersagaqarpoq.

Imm. 1-imut

Naliliinerit uppersaasersuinerillu aalajangersakkami allaqqasut meeqqat ataasiakkaat misilitsittarnissaannut soraarummeertarnissaannulluunniit tunngassuteqanngillat. Ingerlaavartumik naliliisarnissamik uppersaasersuisarnissamillu pisussaaffik meeqqat ataasiakkaat imaluunniit inuusuttut ataasiakkaat ineriartornerannik nalunaarsuisarnissamut taarsiullugu meeqqanut imaluunniit inuusuttunut tunngatillugu perorsaanikkut siunnerfeqartumik sulinissamik siunertaqarnermik pissuteqarpoq.

Ataatsimoortumik naliliinissamut uppersaasiortarnissamullu tunngatillugu oqaatigineqassaaq, ataatsimoortumik nalilersuineq tassaagajuttussaammat inunnik attaveqartarnermi, nukinnik atuisinnaanermi, timimik aalajatitsisinnaanermi, oqaatsitigut, misigissutsitigut avatangiisinillu paasinninnikkut aammalu paasisaqarsinnaassutsikkut meeqqat imaluunniit inuusuttut ineriartornerat.

Ineriartornermik allaaserinninnerup sorliup atorneqarnissaanut tunngatillugu killiliinernik aalajangersagaq imaqaanngilaq, tassa naliliinerit uppersaasersuinerillu immikkoortumi siunissami ilisimatusarnermut ineriartornermullu ammasuussammata.

Imm. 2-mut

Meeqqap imaluunniit inuusuttup pilersuisuiniut tunngatillugu malitseqartitsinissamik pisussaaffeqarnermik imaqarpoq, taakkulu tassaagajupput angajoqqaatut oqartussaasut, aammalu tassaasinnaallutik inuit suliamik ingerlatsinermi susassaartut, psykologit,

perorsaasutut, immikkut atuartitsinermut siunnersortitut atorfillit perorsaanermut tarnip pissusaanut siunnersuisarfimmi atorfeqartut (PPR), ilinniartitsisut siunnersuisartut, peqqissaasut, inunnik isumaginnittoqarfik assigisaalluunniit.

#### Imm. 3-mut

Aalajangersakkami imm. 3-mi meeqqat imaluunniit inuusuttut pilesuisuinik oqaloqateqartarnernut tunngatillugu ikinnerpaaffissaannik aalajangersaasoqarpoq, oqaatigineqareersutullu taakku angajoqqaatut oqartussaasuusinnaapput. Aalajangersagakkami meeqqap inuusuttulluunniit ineriartorneranik ingerlaavartumik pilersuisuusut naliliisartussaanerit eqqarsaatigineqarpoq.

### § 29-mut

Aalajangersagaq nutaajuvoq suleriaatsinilli aaqqissuussinermut ersisitsilluni.

#### Imm. 1-imut

Aalajangersakkakkut qulakkearniarneqarpoq meeqqat inuusuttullu sunngiffimmi ornittakkami kommunip ingerlataani imaluunniit sunngiffimmi ornittakkami imminut pigisumi inissarsisimasut taamaatinneqassanngitsut, peqatigisaanik taamaaqataanit neqeroorfigineqarsimanngippata imaluunniit allamit naleqquttumit neqeroorfigineqarsimanngippata.

Neqeroorutip taamaaqataa imaluunniit allamit naleqquttumit neqeroorut tassaasinnaavoq sunngiffimmi ornittagaq kommunip ingerlataa alla, sunngiffimmi ornittagaq imminut pigisoq imaluunniit sunngiffimmi ornittagaq namminersortoq.

#### Imm. 2-mut

Immikkut ittumik pisoqarsinnaavoq, assersuutigalugu meeqqanut inuusuttunullu allanut sunngiffimmi ornittakkamiittunut atatillugu suliassanik isumaginissamut akornutaasumik meeraq inuusuttorluunniit pissusilersorpat. Taamaatitsinnginnermi ajornartorsiutit aaqqinniarlugit angajoqqaat pilersuisulluunniit suleqatigineqaaqartariaqarput.

#### Imm. 3-mut aamma 4-mut

Aalajangersakkakkut innuttaasut qaqugukkut qanorlu taamaatitsisarneq pisinnaanersoq pillugu ilisimasaqalersinneqarnissaannik siunerineqarpoq.

### § 30-mut

#### Imm. 1-imut

Aalajangersagaq nutaajuvoq. Atualertussat pillugit inatsimmi § 15-imi ulluunerani paaqqinnittarfiit pillugit taamaattumik aalajangersagaqarpoq.

Aalajangersakkami pineqarpoq meeraq imaluunniit inuusuttoq sunngiffimmi ornittakkamut allamut nuunnerani, meeraq imaluunniit inuusuttoq pillugu paasissutissat attuumassuteqartut ingerlateqqinneqartassasut.

Paasissutissat attuumassuteqartut imatut paasineqassapput uppernarsaatit suugaluartulluunniit, tassunga ilanngullugit ineriartormik allaaserinninnerit siunnersuummi § 28 malillugu pissarsiarineqartut.

Imm. 2-mut

Aalajangersagaq nutaajuvoq, piginnaatitsinermillu imaqarluni, taassumalu kingorna Naalakkersuisut nalunaarut atorlugu malittarisassiorsinnaapput paasissutissat imm. 1-imi taaneqartut qanoq iliorluni ingerlateqqinneqartassanersut pillugu, tassunga ilanngullugit elektroniskinnngorlugu ingerlatitseqqiineq aammalu ingerlatitseqqiineq immersugassat aalajangersimasut atorlugit pisassasoq aammalu ingerlatitseqqiinissamut piffissaritat aalajangersarneqarsinnaallutik.

#### § 31-imut

Aalajangersagaq nutaajuvoq.

Aalajangersagaq naapertorlugu malittarisassiorneq pisassaaq kommunalbestyrelsi tamanna pillugu isumasioereerneratigut. Tassunga tungavilersuutaavoq aqutsineq allaffissornerlu sulisullu amerlassusiligaanerat pillugit pissutsit tassaammata sulisitsisup aallaaviatigut pisussaaffiisa ataanniittut.

#### § 32-mut

Imm. 1-imut

Aalajangersagaq kulturikkut ingerlatsineq sunngiffimmi sammisassaqaqtitsineq pillugit peqqussummi § 17-imi ingerlatitseqqinneruvoq.

Imm. 2-mut

Aalajangersagaq nutaajuvoq suleriaatsimillu aqqissuussinermut ersisitsilluni.

Imm. 3-mut

Aalajangersagaq kulturikkut ingerlatsineq sunngiffimmi sammisassaqaqtitsineq pillugit peqqussummi § 19, imm. 1-imi ingerlatitseqqinneruvoq.

Imm. 4-mut

Aalajangersagaq Kulturikkut ingerlatsineq sunngiffimmi sammisassaqaqtitsineq pillugit peqqussummi § 19, imm. 2-mik ingerlatitseqqinneruvoq. Nutaatulli kommunalbestyrelsi isumasioqatigereerneratigut malittarisassiorneq aalajangersarneqarluni. Aammattaaq

akiliisitsisarnissat katersuiniartarnissallu taaneqartut pillugit maanna malittarisassiortoqarsinnaalerpoq, manna tikillugu taamaallaat akiliutit annertussusissaat malittarisassaliorneqarsinnaasimallutik.

#### § 33-mut

Aalajangersagaq nutaajuvoq suleriaatsimilli aaqquissuussinermik ersersitsinerulluni tamanna aamma piunasaqaatit Kulturikkut ingerlatsineq sunngiffimmilu sammisassaqaartitsineq pillugit peqqussummi ersersinneqarpoq.

#### § 34-mut

##### Imm. 1-imut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 18, imm. 1-imik ingerlatitseqqinneruvoq.

Aalajangersakkakkut siunertarinearpoq qulakkeerneqassasoq, sunngiffimmi sukisaarsaartarfinnik klubbinik meeqqanut inuusuttunullu tamanut atorluarsinnaasunik neqerooruteqarnissaq. Aalajangersagaq taamaallaat kommunit sunngiffimmi sukisaarsaartarfinnut klubbinut ingerlataannut tunngavoq.

##### Imm. 2-mut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 18, imm. 2-mik ingerlatitseqqinneruvoq.

#### § 35-mut

##### Imm. 1-imut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 20, imm. 1-imik ingerlatitseqqinneruvoq.

##### Imm. 2-mut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 20, imm. 2-mik ingerlatitseqqinneruvoq.

Imm. 4 tunngavigalugu tamanna pillugu malittarisassanik aalajangersaasoqarnissaata tungaanut kommunalbestyrelsi nammineerluni aalajangersaasinnaavoq klubbit akuerineqanngitsut akuerineqarnissaannut piunasaqaatit suut eqqortinneqassanersut aamma nakkutilliisussaataaneq qanoq isumagineqassanersoq.

##### Imm. 3-mut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 20, imm. 3-mik ingerlatitseqqinneruvoq.

Imm. 4-mut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 20, imm. 4-mik ingerlatitseqqinneruvoq.

Kaajallaasitakkut nr. 1-ikkut, 14. januar 1981-imeersukkut sunngiffimmi sukisaarsaartarfinnut klubbinut kommunit ingerlatarinngisaanut ileqqoreqqusat imarisassaart pillugit malittarisassanik aalajangersaasoqarsimavoq.

Malittarisassat nutaat kaajallaasitap aalajangersassavaa qaqugu ilisimatitsissummik taarserneqassanersoq.

#### § 36-mut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 21-mik ingerlatitseqqinneruvoq.

Aningaasanoorutit ilaannit aningaasanik agguaassisarneq pillugu tapeeriaatsit, tapiiffigineqarnissamut piunasaqaatit il.il. pillugit Namminersorlutik Oqartussat nalunaarutaanni nr. 2-mi, 26. januar 2015-imeersumi § 6-imi meeqqat inuusuttullu peqatigiiffiinut ukioqqortussutsumut killiliussaqaq allanngunngilaq.

#### § 37-mut

Aalajangersagaq nutaajuvoq. Kulturikkulli ingerlatsineq sunngiffimmilu sammisassaqaartitsineq pillugit peqqussummi § 27-mi timersornermut meeqqat inuusuttullu suliniaqatigiiffiinut sanilliullugu killiliinissaq pillugit malittarisassiornissamut tunngavissaq pillugu taamaaqataanik aalajangersagaqarpoq.

#### § 38-mut

Aalajangersagaq nutaajuvoq suleriaatsimillu aqqissuussinermut ersisitsilluni.

#### § 39-mut

Imm. 1-imut

Aalajangersagaq kultureqarnermut sunngiffimmilu sammisassaqaartitsinermut peqqussummi § 37, imm. 1-imik ingerlatitseqqinneruvoq.

Imm. 2-mut

Aalajangersagaq kultureqarnermut sunngiffimmilu sammisassaqaartitsinermut peqqussummi § 37, imm. 2-mik ingerlatitseqqinneruvoq.

## § 40-imut

### Imm. 1-imut

Aalajangersagaq nutaajuvoq.

Naalackersuisut tapiissutaannik tapiiffigitittut uppernarsaanissaannik qinnuigineqarneratigullu tapiissutit siunertamut atorneqarsimanerannut uppernarsaanissaannik taamaallaat piumaffigineqarnissaat pisariaqartinneqarsimavoq.

Kommunalbestyrelsimiit tapiissutit eqqarsaatigalugit naatsorsuutitut kukkundersiuinermullu piumasaqaatit kommunip oqartussaaffiisa ataaniippoq.

### Imm. 2-mut

Aalajangersagaq nutaajuvoq.

Malittarisassani pineqarsinnaapput naatsorsuutitut kukkundersiuinernillu saqqummiunneqarnissamik piumasaqaatit. Tassunga atatillugu killiliisoqartariaqarpoq qaqugukkut naatsorsuutitut kukkundersiuinernillu saqqummiussinissaq pisariaqarneris qaqugukkullu uppernarsaammik saqqummiussinissaq naammannersoq.

## § 41-imut

### Imm. 1-imut

Aalajangersagaq nutaajuvoq, nalinginnaasumilli aningaasaliinermut piumasaqaatinik aaqqissuussinermut ersiutaalluni.

### Imm. 2-mut

Aalajangersagaq nutaajuvoq.

Tapiissutit utertillugit akilerneqarnissaat pillugit malittarisassat assersuutigalugu utertitsilluni akiliinissaq qanoq pisinnaanersaq pillugu malittarisassat pineqartunut ilaasinnaapput.

## § 42-mut

### Imm. 1-imut

Aalajangersagaq kulturikkut ingerlatsineq sunngiffimmilu sammisassaqaartitsineq pillugit peqqussummi § 40-mi oqaaseqatigiit siulliannik ingerlatitseqqinneruvoq.

Nutaatut aalajangersarneqarpoq, Naalakkersuisut aalajangigaat allaffissornikkut oqartussanut allanut naammagittaalliutigineqarsinnaanngitsut. Tamanna periuserineqartunik katersuineruvoq.

Imm. 2-mut

Aalajangersagaq kulturikkut ingerlatsineq sunngiffimmilu sammisassaqaqtitsineq pillugit peqqussummi § 40, oqaaseqatigiit kingulliannik ingerlatitseqqinneruvoq.

Naalakkersuisut aalajangiisinnaanermik tunniussisimanerannik tunngaveqartumik naammagittaalliuteqartoqarsinnaavoq.

#### § 43-mut

Imm. 1-imut

Aalajangersagaq kultureqarnermut sunngiffimmilu sammisassaqaqtitsinermut peqqussummi § 39, imm. 1-imik ingerlatitseqqinneruvoq.

”Misileraalluni aaqqissuussinerit” inatsisip atuuffiata iluani periarfissanik misileraanertut paasineqassaaq, inatsimmi malittarisassat aalajangersarneqarsimasut iluanni piviusunngortinneqarsinnaanngitsut eqqarsaatigalugit. Ingerlatat ingerlataagallartutut ingerlanneqassapput suliassaqaqfiullu pineqartup ineriartortinnerani atorneqarsinnaasunik misilittagassarsionernut ilaasalluni.

Imm. 2-mut

Aalajangersagaq kultureqarnermut sunngiffimmilu sammisassaqaqtitsinermut peqqussummi § 39, imm. 2-mik ingerlatitseqqinneruvoq.

#### § 44-mut

Imm. 1-imut

Aalajangersagaq nutaajuvoq, suleriaatsimulli aaqqissuussinerulluni. Kulturikkut ingerlatsineq sunngiffimmilu sammasassaqaqtitsineq pillugit peqqussummi § 36-imi atugassarititaasunik aallaaveqarsinnaavoq. Tassuunakkut aalajangersarneqarpoq Naalakkersuisut kommunalbestyrelsimut paasissutissanik peqqussut malillugu isumagisassaminnut pisariaqarsorisatik piumasinnaavaat.

Imm. 2-mut

Aalajangersagaq kulturikkut ingerlatsineq sunngiffimmilu sammisassaqaqtitsineq pillugit peqqussummi § 36-mik ingerlatitseqqinneruvoq.

Naalakkersuisut inatsit malillugu suliassat isumagisinnaassagaanni paasissutissat suut pisariaqartutut isigineqassanersut naliligassaraat.

## § 45-mut

### Imm. 1-imut

Piffissaq atuutilersitsiffissatut siunnersuutigineqartumut tunngavilersuutigineqartoq tassaavoq, inatsisip atuutilersinnissaanut piffissaqarluarnissaq, matumani nutaanik allaffissornikkut najoqqutassanik, paasissutissanik ilitersuutinillu atulersitsineq ilanngullugu eqqarsaatigalugu.

### Imm. 2-mut

Kulturikkut ingerlatsineq sunngiffimmilu sammisassaqtitsineq pillugit peqqussutip atorunnaarsinneqarnera peqatigitillugu inatsit atortuulersinneqarnissaa siunnersuutigineqarpoq. Tamannali taamaallaat atuuppoq ilaanut timersornermut timigissarnermullu tunngasuunngitsunut, tassami timersorneq timigissarnerlu siunnersuummut ilaangimmata.

Sunngiffimmi sammisassaqtitsineq pillugu Inatsisartut peqqussutaanni nr. 5, 9. april 1992-imeersumi §§ 9-10-mi ilinniartitsissutini ataasiakkaani ilinniartitsineq, meeqqat atuarianni imaluunniit ilinniarnertuunngorniarfimmi ilinniagaasartunik naggataarutaasumik misilitsinnissamik siunertaqartut pineqartunut ilaapput. Ilinniagassanik ataasiakkaanik atuartitsisarneq sunngiffimmi atuartitsisarneq pillugu kapitalimiit peerneqarpoq, piginnaaneqalersitsiniarluni atuartitsisarnerup ilinniartitaaneq pillugu inatsisitigut malittarisassaqtitaanissaa kissaatigineqarmat. Atuartitsissutini ataasiakkaani ilinniartitsineq meeqqat atuarianni naggataarutaarutaasumik misilitsinnissamik siunertaqartoq maannakkut Piareersarfimmit meeqqat atuariannut malittarisassat atuuttut naapertorlugit isumagineqarpoq. Atuartitsissutini ataasiakkaani ilinniartitsineq ilinniarnertuunngorniarfimmi naggataarutaarutaasumik misilitsinnissamik siunertaqartut ilinniarnertuunngorniarfinni ilinniartitaanernut malittarisassatut aalajangersarneqartut naapertorlugit ingerlanneqartarput.

### Imm. 3-mut

Aalajangersakkakut allaffissornikkut najoqqutassat atuuttut atuutiinnassapput malittarisassat Inatsisartut inatsisaat manna inatsisilluunniit allat naapertorlugit atorunnaarsinneqarnissaata tungaanut imaluunniit aalajangersakkanik allanik taarserneqarnissaata tungaannut.

Inatsisip akuersissutigineqarneranut atatillugu allaffissornikkut najoqqutassat atuuttut nutarterneqarnissaat naatsorsuutigineqarpoq, taakku amerlanerpaartaat pisoqalinikuupput.



